

003649

清容居士集  
附札記

七

003649






清容居士集

附札記

(七)

袁 煥 撰



贊書集成

初編

著者 吳 玉  
五

商務印書館發行

# 清容居士集卷第二十

記

邵庵記

雍虞伯生界其居之偏爲庵廬焉。溫清之隙則怡怡然飽食以歌。宴休于中。其廬溫密。樸質具粹。且深中而虛之。若璧而環。若鑑而明。樞圓而扉方。闔闢以動止。其溫燥也。裊以舒其清焉。其淒厲也。隕以休其和焉。左顧右矚。神止氣寂。晝握其動。夜根其靜。不巧飾于外。據萬物之會。將以極其榮觀者焉。廬不廣尋丈。旁設易圖。圖除其卦五十有六。瞪而視之。首擊而尾應。迎而存之。風至而水涌。審聲遺形。益原其情。忽然控浮游以上征。則搏制控伏。囿于其內。而不能以自恣。或曰。非輕世遠舉者。不得以專。是伯生曰。維昔邵先。遭時明康。玩芳以嬉。不激不隨。順其隆汗。儒者之準也。吾將尊其廬曰邵庵。何如。桷曰。可乎哉。言無郵乎。夫敦厚而靈明者。君之先也。峻簡而絜精者。君之光也。自君之出名。日以張。莫窮其鄉。黽黽然聲音笑貌之學。詎昔之志也。勉之哉。茲廬之制。易而不卑。簡而不倚。其取諸物。非鑠我者也。由質以成。禮無踰矣。迺觴以祝之。介其休明。曰。烟烟焜焜。維道之門。惻惻款款。維德之本。美哉廬乎。足以爲永居乎。袁桷記。

古劍記

吳成季得劍一于故吳之區。窮首以度。合周尺二十有一寸。下縮而圓。人盡其握。瓏倍於臘。東西半焉。鐔

長五寸有奇。口懸三空。古飾以琤具者。金氣消竭。玉質湛湛然。望其鋒。肅而不剴。黝乎以溫。如鑑之示明。揣其章。若冰之在防。養其寒光。泊焉不知所疑。日出而觀。則陸離以陳。爲丹爲碧。起滅於膚理。風雨以休之。隱隱歷歷。欲泄而強抑。客曰。此何祥也。成季曰。粵古至人。絕世遁逃。有不得已。則託劍以象五金之精。竊陰據陽。繇神以成。非劍之能也。維吾道祖。以劍印授受。爲漢世遺物。傳信可根據。劍歸宣和。今得于吳。吳爲故都。庸詎知非昔之所寶。且夫化而沈於淵。物之靈也。返之於山。物之完也。或曰。以神不以形。又曰。以德不以物。形與物其果有變乎。袁桷記。

昭真山水記

廣信昭真山。晉王仙居。山祖閩武夷。宗爲天冠。巖翼行數十里。左右扈挾。悉至觀迺伏。北俯貴溪。又正北。當縣居中。匯泉曰寒月泉。與藥池丹井通。遵井南。鱗瓦削列成廡。有泉縣溜廡下。拾級以升。曰金沙。益南。至于昇仙臺。臺石天設。空明無依。傳言王仙化是。又南石室。坐可二十席。下視屋邑。蟻髮旋縷。凡登山者。不盡適不返。故冠以逍遙焉。上巘爲靈湫。逍遙西多故賢居。三山品列。徐紹宗隱。益下北麓。陸文安公書堂奠焉。循西有吳緬石。潛谷巖。小隱巖。皆以處士著。吳緬石形成五嶽。復曰五面。迤東爲峯二。曰老人石人。東屈而下。得名六。學堂以虛名。仙足月巖以形名。鬼谷以真隱名。鬼谷東石壁中穴環。好風出。湧泉曰風洞。輔東益高。有石箕瓢。器物成琢。潭深不測。以礫潭名。又東極下。水鉤盤巖。壁削立。旌陽許令刺蛟。于是唐名曰馨香觀。道士祝丹陽繪圖。俾志且言。其山清刻深古。多異石名木。歲不識伏日。泉品與惠山。

同。自唐李商隱、劉大用、王荆公、毛澤民而下，著詠可傳信。夫山南爲陽，主陽賓陰，鍾其所極，鬱之而不化，可慕可愕，不一以足。然神獨齋之，使沖漠者專其靜居，絜絜然好游之士，少紓其耳目，而卒不昇，何也？世言名山多方外居，益以昭真爲信。丙午二月袁桷記。

東山精舍記

自民迫於生而儒日益病，清宗華門淪圯，乘接闕然絕環珮聲，束裝韞衣，方偃伏卻立，而甚者貿貿途路間，益困苦不復振，或以謂升降迭偶之理使然耳。噫！首是說者，其未知所養與？予客京師，豫章周儀之甥冷有泰，復先辱其游，問其年，則宜若與昔不相接近，而甚頌且文。予始異之，儀之曰：不然，冷爲分寧故族，官簿相接，所居曰東山，山橫重屏，方列若刻，其尊正叔治屋一區，負山爲居，治堂翼然，疏沼縈然，幽林絜石，奇梧秀竹之森爽，以繚前拱而導，則黃龍幕阜，蜿蜒效焉，平臯沃畛，鱗集備焉，朝光夕霏，戶牖進而几席納也。正叔閉門幾三十年，服居士衣，設丈席講論，終日危坐清思，無纖芥糠粃，時爲詩詞，凌厲頓伏，索索裂金石，舉觴雅歌，晝雅以敝，酬酢揖讓，猶昔時衣冠家氣度，而卒相避會，恍然知爲非人間世也。嘗聞正叔舉童子時，意功業可拾取，今迺摧落刊實，益自斂避，彬彬文質，久而蓋彌章焉。夫不急於外者，宜有裕於後。大江以西，士風炳如，於是乎則，故予首書其慨然者，以厲吾黨，知正叔爲可徵，四明袁桷記。

采芝亭記

太行首於三危。伏於河。折北而尊爲恆山。支巒複岡。畢赴於燕。秩秩然復纒屬。以東數十百里。入於海上。土人以其西來。號曰西山。或曰駿極。于是山急而墜。凝地多空寒。不可以兆域。又曰。是爲都城之衝。自北而南。太和薰然。捨是奚所適。於是工部尙書郝公景文。惕然維思。實震且陰。迺相其大塋。先君子之藏。祔陔而善崩。始遷而謀焉。大德甲辰。得卜於某山。卜者曰。是山之形。翼容而味鳴。日中而升。戴坎以寧。以華以承。及旣葬。明年。守冢以芝告。公弗信。展于墓下。登坡而望。則敷者萋萋。燁然于山。效獻以萬。歸以示其客袁桷。噫。是果爲芝邪。今舉世之言瑞者。必首於芝。芝不常有於世。故窮夸闡珍。得一二焉。輒指以自瑞。使誠瑞邪。守畛尺壟。其融液變化。不若是之固。而甚者竭四海之類。夫芝者。聚焉以觀。不亦陋乎。夫土和則芝生。始公之心。懼親之不寧。故擇其溫密。以永其幽。菌蠢而擢。靈土之和也。盈數爲萬。非昔之固也。不侈以求。異德之負也。維山之陽。彌鞏彌剛。子孫之祥也。孝感而文著。於瑞乎何有。

梅亭記

廣信據江浙閩越之衝。萬山交牙。四顧羅劍戟。其氣蜿蜒磅礴。爲丹碧玉石。長溪貫其中。凝膏溢藍。愈積愈完。山水之秀甲諸郡。故其俗多刻厲自奮。矜謹節義。言文學道德者爲儒宗。治政事者爲吏師。建炎初。中原縉紳家。多居是州。其舊聞遺語。尊守傳信。歷歷可數。皆數百年文獻源委。非如野人篋子。掇拾目近。爲利祿地方。是時。人物之勝。足以甲山水。而浮屠老氏之跡。實不與焉。弋陽爲縣。山益深。水益清。車輪馬足之聲。不入于其境。寒泉蒼巖。百里一色。山之陽有陳隱君居焉。隱君守儒以自信。閉門授書。朝夕盥饋。



合其孫曾嬪婦男女將百人。年九十四以終。有子曰德父。教授帶湖十年。法當得致仕。官以鄉博士歸于家。迺築室。旁近之華山爲雲居。雲居之西爲梅亭。曰香月。於是其子敏學志仲。官京師。俾予記之。且言曰。自吾大父恂恂之於是居也。詩書以持。稼穡以時。門無忿色。而少長以敝。吾不知其化之及於里也。自吾父觀之。今七十餘矣。誦聲滿戶。而樽罍在牖。氣完而色康。其行舒舒。其語徐徐。視吾祖之孫曾。亦相邇也。噫。榮何以過是。袁桷曰。天地之理。嗇者豐之。始周流于六虛。其暗也實明。其闕也實闔。昔之澹然而無營者。德之基也。養之于其身。而施之于其後。充以引之。吾知其孝謹於家者。日益廣。爵祿於朝者。日益侈。視斯亭之手植豐融。婆娑連理。而竝實陰陽之生物。其不出於是明矣。詩曰。高山仰止。景行行止。亦因以勉夫志仲焉。

### 西泉記

高君舜臣。通敏才智之士也。治其齋心之居。表其顏曰西泉。爲予言曰。太行之山。合于恆山。隱伏聯亘。北東以入于海。肅慎朝鮮。屹然表于其地者。皆支絡也。泉生於西歸於東。陰陽之常性也。周人有言曰。肅慎燕亳。吾北土也。昔之疆理。吾於是乎考。則凡北紀之山水。繇西徂東。所繇來審矣。爲我記之。舜臣於金爲大姓。官簿歷歷可紀。居京師數世。遡其泉源。知其晝夜之不止。必達于其里。禮不忘其本。其高君之謂與。予官京師。踰十餘年。望所謂西山者。蒼拔翠峭。實太行之苗裔。水流無窮。演迤洋溢。導之爲漕渠。止之爲陂塘。資國用以爲民食者。泉之利也。其次達官貴人。因之以丘壟。濬其冽清。挹其回環。蔭藉蕃廡。將利其

子孫以求全乎茲山之下。不知其幾。至於淡泊空曠之士。則又抉尋幽深。淳膏匯甘。使夫絕塵稅駕者。止焉以嗟。啜焉以留。無有窮已。噫。西泉之效誠博矣哉。在易之象曰。山下出泉。蒙。其險釋矣。謹其所之。君子之用也。高君致用以推本。厥旨明矣。究反復之道。益驗於身。將見其百折而不撓。獨行而不懼。非茲泉也。與。念其祖德。繫命名之意。與其兄堯臣。閉門窮經。沈思篤行。予得與之交。將竝游夫西山。感夫昔之廢興。不在於險。則泉之東。其寧有已邪。

戀庵記

慈溪黃彥實。少喜豪士。漫游故都。見世所稱知名人。率脂韋自保。祕惋恨無可與語。酒酣氣雄。謂海寓方宴安休明。宜取天下事。置念慮。以入計畫。否則搜抉險幽。浩然爲萬里游。遇不遇命也。未幾。泝采石。上漢江。西游荆襄。歷觀用武關要。荒榛廢壘。猶有能言昔時得失。益慷慨自振。而所見公卿大夫。與夫布衣之士。則皆與昔交游者無大異。於是治其居曰戀庵。以自傲。求記於予。亟請焉。昔之養生者。志專而若愚。遺世絕俗。懼其名之至也。介然以逃。泊然以遨。聖人憂之。慮其器之不弘。不足以任斯道也。然舉世之士。樂同而惡異。曲者常安。直者易危。則寧直焉者斯近矣。彥實智通於事物。行幾於古人。視今世之戀者。吾能言之。草野游京師。決臆裂眚。不顧生死。詣廟堂。求奇中。書未出袖。而利祿萌於中。非戀也。鄉里稱任俠。大言斷是否。陰持短長。以利己。非戀也。佯不絮清。詆罵排觸。而私有揣摩。問之而若樸。卽之而彌汗。若是者。又其似而靡者也。彥實先大夫文節先生。爲史館官。咸淳上殿。論浮屠不宜入禁掖。度宗大怒。手詔出國。

門未幾貳守桐江。與宰相兄子爭事。卒易他郡。黷無以易此矣。古之君子。事至而名隨。人棄我取。自謙之道也。聞彥實居山中。閉門讀書。益不妄交。求古聖賢摧折困踣之本。發而不可犯者。養之至也。予歸里。聆其言。斯知之矣。延祐五年夏四月。越袁桷記。

### 桂山堂記

江南地宜桂。故凡廣居室者。必植之以爲美觀焉。釋木者曰。桂。白華叢生。冬夏常青。人取以自近。良有以也。地記言。八公從淮南王後。入山爲仙。作叢桂詞。與漢史所記異。予獨愛其簡潔幽古。爲文章宗師。申言攀援。非自息於林莽者。讀其辭。可悲也矣。上饒周君□□居龍虎山。因其地之隆。植桂于上。築堂面之。而名曰桂山。徵記於予。予曰。今龍虎山爲道家統宗。金碧晃曜。出于縣官。搜奇抉幽。異夫昔時之荒煙古木。軫相結而袂相接也。周君主畫諾以極其榮觀。則今之所命名者。若不相似。何也。然予嘗聞古之至人。其須恂恂。其言諄諄。執中以權。損益其未備。黜紛華以從事于寂寞者。非有所激也。周君智周於身。謙抑自持。思夫山林之靜養。其沖泊先事。以自警。古之所謂備豫而能立者。近之矣。周氏之先得道於希夷。陳先生當熙寧時。猶亡恙。見其曾玄離世樂善樹德之訓。有自來矣。且夫託物以喻志。詩人之心也。仰觀於山。徐視吾手植者。風雨冰雪。貫四時而不改。擬諸形容。得無似之乎。異日將游山中。詠八公之辭。反招寫心。僕援筆。未敢以老爲辭也。

### 張尙書救荒後記

儒學提舉天台柯謙自牧爲序一通言今工部尙書張公之佐江浙也活飢民褫貪帥爲去思帥能歌詩者追美之是可謂無負張公矣往歲桷以翰苑屬歸里里人言元帥府始治婺女有總戎官鎮慶元言慶元聯蠻國入海最近稍失控御兵燹不可測乘驛入都白利害時太傅丞相坐省中盛言總戎非兼元帥不足以重鎮太傅察其言有私便後雖移鎮而卒用常調官如舊制焉大德十一年歲大饑浙東副帥□□命屬吏疾傳詣行省告變曰慶元接海口僅數十里羣盜據島嶼出沒將入城剽劫願速分行省軍往翦其窟穴緩則不可治行省大驚將如議張公時爲郎中丞相謂公曰計安出公以調兵非所預丞相固問則曰果有變帥府當印署白省副帥獨遣非完議也召屬吏問變奚自府有鎮守官今上變爲何地屬吏類首不能對遂移檄問盜今安在帥府得檄大驚咸言無是事繇是卒不發兵而慶元迄無它噫方副帥造謀時當饑侵窮困之急稍加以兵山海逋竄寧能斂手以快鋒鏑一有抗拒誣以叛逆則凡故家大姓蔓延於囹圄之下將不可勝計人能知救荒之爲美績而不知吾里之人微張公之言有不待賑恤而皆置於死地矣敢書以補郡乘俾知夫立帥府本末蓋如是張公名□字士瞻衛郡人處事明遠知大體若是事寧勿爲記其可乎

晚香堂記

延陵吳成季父奉萬年之祝于崇真大德甲辰二月承詔爲祠官于衡山復命歸祠其受道之山曰龍虎龍虎於番爲接壤番於成季爲鄉井於是其嚴君偕七十矣迺避館屏驕卻入里閭舉觴再拜以祝以壽

宗黨姻友。旁列敍坐。勸酬以禮。進退維度。聚而言曰。嘻其盛哉。成季曰。不然。繄昔遠祖。挈國以讓。晚交兵間。既壽且康。至于番君。墜緒以興。維用之嗇。報必以厚。自吾少時。聞爲是州。一不承意。則交喙爭誚。而吾父子吟詠。佔畢。訥訥謙讓。不能出諸口。至論成敗衰盛。嘗掩卷三歎。以自警厲。而今也。二老人康強。起居佐理。內外冠帶。童卯成立。左右其迨乎遠祖之意。願築堂以奉。而名曰晚香。其何如。衆曰。唯唯。未幾來京師。屢屬予以記。予以謂大夫士之養。莫侈於羊犬豕。而世之希年遠引者。至以金石草木爲可久。菊水之壽。效極於胡廣。昔之議廣。猶若糞土。則名與年較。不相竝。今成季榮於其身。顯於其親。惓惓然企本支之盛。吾見吳氏子孫。孝謹遜于里門。秀敏有列于朝。而耆耄老人。方遊遨嬉戲。擊鮮養醲。若古之所謂偕老而終隱者。其不在茲也。傳記言王公大人。晚歲託言神仙。多以遠禍。成季游乎方外之畛。憂世嫉邪。嘗不自置。異時承渥流問。則司馬子微之對。殆猶糠粃。而名以晚香者。非獨爲吳氏美。是特有待於成季也。四明袁桷記。

### 玉冠記

大德乙巳歲二月甲申。皇帝受釐于玉德。迺命尙服出玉冠。以賜玄教真人張公。其製爲山形。空其梁。述溫栗精潤。隆殺悉等。莫有究其攸始。袁桷見之曰。此紹興宴居所服。韜髮冠也。舊聞長老言。思陵爲清暑樓。聚金石奇刻。飛湍清樾。森鬱蕭爽。伏日退朝。衣白縠羽衣冠。小玉冠。閱定書蹟。其殆是與。維古弁冕。雜飾以玉。至晉宋間。君臣上下。崇習玄理。清逸修簡。始爲玉冠。今世所傳元帝像。及晉賢圖軸。與此無毫髮

異則紹興所冠。猶古帝王遺物。按道家書言神君始建飛天玉冠。其製與遠游爵弁微近。疑有差等。含玄秉陽舒精吐光。繫冠維則。欽承是天寵。進道之篤。其不在茲乎。夫王者陽中之陰也。首者體形之上。神明之主也。陽非陰不能以成。合而凝之。出入于斯。易之門也。方今張公以清淨理。贊益照洽。縝密而不露。孚尹而不泄。遠而望之。誠理勝矣。庸述其始。以示于後。袁桷謹記。

孝思亭記

三山吳明之。築亭於陽岡大父之墓側。名之曰孝思。按昔之言禮者。則曰魂歸于所居。將致其一焉。墓有祭有亭。爲非古矣。善乎延陵季子之言曰。魂氣無不之也。夫專于祠宇。不意若是拘也。物精神著。其氣發揚者。出于丘壟。是則必首於墓。將奚以疑。古之聖人。懼其瀆且數也。嚴爲之防。速貧速朽。夫豈非夫子之語。祭墓爲尸。是墓有祭矣。祭而不屋。失祭之禮矣。絲未宰。輔修其墓田。不復拘甲令。層樓巍閣。空青金碧。巋然于坡陁之阜。過者必式。其防遏森翊。誠以爲千百年無慮也。乾坤合運。頽垣廢址。上牛羊而履荆棘。欲求子孫不可得。而明之方慎其繚圍。構亭以綏其體魄。是則過於盛者必有衰。吳君之志。追遠以求。旨微意深。鬱勃之興。將自茲始。大舜五十而慕。昔以爲難能也。遡而推之。探其微旨。亦難能也。禮抱孫不抱子。耐于王父。幽明之通。瞭然而莫遺。明之審之而克行之。桷也。故國之公孫。其思于祖父也。罔敢替。因繹其旨爲之記。

福源精舍記

建炎初。秉義李君以勇略捍衛鄉社。倜儻急義。植德流衍。諸孫以詩學接武科目。恂恂退讓。望知爲秉義家子弟。衣冠浸微。獨溧水府君之子登仕君。寄隱廩市。厖眉幅巾。治生產益有理。年逾七十。迺卒。予請告歸里。其子印傳以事狀踵門求記其精舍。俾永遠。嘉熙間。溧水君卒于縣治。登仕甫八歲。祖母朱氏奉其喪以歸。將葬于上元之祖塋。朱母泫然曰。孤兒奚依。少不利。必墮其先祀。相于慈溪東嶺楊輿之山。卜告以吉。結爲四塋。昭穆以敘。而以其殤女附于旁。近登仕長。有室曰茹氏。朱母卽世。旣葬。茹氏曰。吾姑以臺中喪成是山。夫君獲有成立。新婦不淑。紹先繼志。弗展擴。則奚以緝前人光。亦斥奩資。廣山壟。建祠屋。精舍以奉其舅姑。茹氏沒于至元之十九年。登仕君沒于至大之四年。大德六年。印傳與其妻胡氏同入山拜墓。顧瞻周迴。蕪圯日廣。胡氏曰。再世尊章有成。妾獨不能少效萬一。聞佛氏有大報恩。而用其法。名爲福源精舍。命僧以居。遂一以浮屠所需者咸備具。復買田若干。命僧某首主。俾其弟子相次以繼。其所度僧。非李氏不得入。予愕而有言曰。吾里卿相什百。各以功德院爲請。有以其田園與子孫。共分析求利益。穹樓矗塔。坡阜松柏。蔽翳綿數十里。時運更易。各降在皂隸。孤童負囊。俛偃不能以入。每恨其祖父作是爲無益也。予嘗過其祠宇。薪草雜糅。破爐凝煤。而主茲所者。儻然有曰。彼昔承寵恩。故幸若是。其子孫何能預。至于士夫之家。庵廬相接。幸其不爲有司之所隸。羣聚毀撤。甚者發其丘壟。噫。可勝道哉。予謂三孝婦之志。人莫能竝。心純而孝專。發於自然。非過信以溺于異端。思其創始。思其悠久。是則秉義之澤。良未艾也。爲浮屠者。聞予之說。寧不有泚其額。印傳復爲穴三一以葬生母張氏。其二則夫婦因以預備云。

治平寺記

治平寺主者以建寺本末謁予爲記。其狀曰：寺在城南門外，渡江曰銅湓浦，鄉曰鄞塘，平疇鬱密，松竹環植，望之竦然。其間者，卽治平也。寺建於後唐清泰，僧曰道隆，以法華勸民習誦，持善果，剋是地三十畝，有奇。始居之，復得別業爲畝六十。其初曰東李浦院，錢忠懿王俶給符牒，俾永遠。又改爲保豐院。宋英宗更元治平，祀明堂，始易今名。法智大師以教乘闡東南，習學皆其徒，故號爲天台宗。元豐間，有性法師講法華，別立機要，從者雲集，而田租漸廣，居民染滯下疾。師呪水飲之，飲者日益衆。師呪於池，悉愈。寺舊有東西池，今呪水池猶甘冽可鑑。師號山堂，卒葬於是。寺嘉熙三年，寺燬于時，上師實主是寺，遂新三門法堂廊廡等若干，迺謝去。淳祐六年，堯師始成殿宇居室，所宜有者悉備。咸淳八年，子直良法師至，曰：吾不可私淑。後學戶屢日接，簡約暢隱，法華之說大備。而治平名益著，率由是陞于南湖者凡數人。南湖，四明之祖庭也。復曰：一蓀守是山，今十有五年，繫前脩是承。昔之營構，皆腐折傾漏，不可支。今幸完復，羸備，惟創建昔人，歟。軼靡有紀，願登其事于石，榜以爲今之爲牧守者。苟度歲月，堤防津梁，田野之不治，尙何能望究其本始爲世胄者。日隳其先，祖父名諱，近在數十年間，有不能答。未有如浮圖氏，泝源推根若是之詳者。道散於九流百家，各自奮植，吾儒之教，末俗以空言爲高，卒不能勝。甚者去其舊籍，郡縣養士之田，皆漫漶不可考。如蓀師所爲，豈不有愧庸。因其狀以紀，亦以勵吾徒之爲師長者云。



出城西門。皆良田白水。高下綠樹。雞犬相聞。翫然農家善於其業者也。予繇京師回。艤舟驛亭望之。則朱甍碧瓦。傑然爲人天居。佛之道以枯槁堅忍爲能事。卉衣糲食。樹下塚間。不求其豐足。故從者樂然如歸。二千餘年。爲之說者。以莊嚴爲善果。愚者益信。狂者益怖。而梵宮寶刹。合郡縣山水之勝。悉爲所據。日增月益。有不可勝言者。四明海之東絕處。爲補陀巖。大士顯焉。鄞之東爲育王山。釋迦舍利塔焉。遵南爲岳林。爲天台。皆游歷之所。而補陀育王。自天子至於王公百司。乘驛奉香幣。不絕於道。四方之民。終歲膜拜。至於西門。始求其渡海之路。然而觸風濤煙霧。率莫悉處所。又舟人伺其危殆。時有不利。目接其事。而來者益不止。豈非其教足以傾動。而爲善者有以復其良心也。有僧曰妙壽。以其建庵之始未告。曰。茲庵之創。專以奉補陀育王。岳林天台之游者也。初卜地於城西。郡民任氏首。不過地千步。屋三楹。有同志僧妙然。日習宗尙。善勸募。傾捨駢集。又有僧元安。清持以行業振勵。信者俱至。善士翁文堅。翼輔之。首建佛宮。且割田以濟。未幾宣慰楊侯梓。益買田以贊。相由是拓地爲畝十五。屋百楹。殿堂門廡。迎賓習靜。各有其地。泛海有舟。放生有池。獨不設方丈。懼後人之佚樂以自恣也。不請寺額。曰海會庵。懼其奪攘以爲茲所之凌替也。其狀若是。願請記以求永久。予曰。博施濟衆。昔之聖人。猶以爲慊。浮屠氏日丐假於外。而皆足以慰其志意。蓋其說汪洋浩博。參之以報應。而爲惡者懼。吾儒之說。百姓日用而不知。卒之以道政齊刑者。不得已之具也。逃空虛。絕人事。釋氏本旨。而其生產作業。皆取於吾教。若今有司興繕。則民不勝怨。咨海會之成。相胥以勸。何其易也。妙壽深湛善思。事爲之防。曲爲之制。其惓惓于後者。厥慮若是。雖欲勿永。

久其得勿永久乎。

重建延福院記

予繇集賢還里居。有僧永華。躡屩重趺。踰數千里。南康來。介天平恩大師。求記延福院興造者。其狀曰。院在南康建昌州西山。曰龍城。唐馬大師嘗憩寂焉。殿有記。宋雍熙間。廣陵沙門處暹所撰。歲久蕪圯。宋末郡始署開陽院。僧紹志主之。墾殖磨刮。集材庀工。鍾閣齋室。凡僧之所居處者。咸屹然以成。至大德庚子。主茲山三十餘年矣。命其徒曰。吾宜藏密。以興造事。付汝等。咸頓首曰。曷敢不承。繼曰。繼福。迺襲院事。首建三門及外門。曰繼祖。繼壽。永翌。廣賓至之所。視昔居處之宜。益廓且完。繼祐。迺曰。吾新殿視瞻廣博。謂色身小大。擬於形容。良非吾道。然徧滿充塞。當有是事。揆諸空幻。則俱非實相。宜改而正。諸遂易舊象。得舍利五色於佛胸背間。宋咸平僧道志所建。或曰。是若有脗合。然者歟。於是梵唄贊頌。而若子若孫。皆勇猛赴事。謁於事佛之徒。增飾金紺。象設尊重。瓶鉢精潔。烜然如人天居。復增其田若干。紹志終于大德七年。壽七十五。葬寺東之陽。今守其遺言。祖子孫相繼如初。孫七人曰。永岫。永岵。永斫。永華。宗松。宗槐。宗權。讀狀畢。迺問華曰。志師能植立若是。宜有本始。華拱手曰。昔圓悟大師得法弟子曰真牧。大師賢賢度其徒幾千人。志其派緒也。予嘗聞釋氏服勤壞形。實本持攝。至於廣居榮觀。將以嚮伏庸駭。除其侈心。非專以是爲能事。生而不居。死而不餘。故其道益固。傳有言曰。又何加焉。曰。教之能仁之教。書遍中國。爲禪學者。不立文字。而其徒復守師說。文字益繁。今而曰教之。於二者將焉取乎哉。他年曳杖游匡廬。西游龍城。

問聰明道理。其必有以告我。則予之記興建。亦得以永久也。

### 資教寺修三門記

吾里法智大師。以至行約言。闡揚天台。大行于浙東西。謂城南延慶爲祖庭。故四明旁邑近郊。雖丈室尋地。多博辯秀出之徒。過於他郡。西山資教其一也。西山在郡西四十里。周顯德元年。號廣德院。宋治平改曰資教。負山面湖。有菱荷鳧鷗舟楫亭橋之勝。凡郡人之游于湖者。必至是寺。湖湮爲田。游者不復至。而寺漸頽圯。紹定中。月公首授徒。是山後謝事。上竺願復領之。世言上竺第一院。西山號最卑。繇月公再居。而寺益重。故講說者爭趨之。延祐□年。道師逢原。以郡選主之。其徒亦曰彼學專靜選。不可易也。予舟過先墓。必望所謂資教者焉。空巖傾欹。樹木翦落。將不堪其居。比還里。則昔之頽然以興。重簷翬飛。表表出林杪。道師曰。吾首新三門。餘以次繕治。不田以食。廢其教。將有愧。集徒講肄。則庶幾希前人光。三門紀修。願以囑焉。考諸禮經。制有五門。雉門居中。故曰三門。秦漢損益。不遵於周。連門爲三。唯王宮得用。官署降殺。非雉門之制久矣。釋老宮室。擬於乘輿。雖儀制有令。不得禁。天台以明靜爲宗。弊衣惡食。脫氛垢。厭榮觀。汲汲以土木爲急。崇信與敬。將於是乎取。夫像設之教。首于西方。其能傾動禍福。必召募焉。以集事。師謝不肯。寺久廢。得人焉。以興。則吾徒之爲校官者。竊食自嬉。安得無愧焉。

### 吉祥寺重建記

主吉祥寺崇柏師。以其興造本末。爲狀一通。俾予爲記。其狀曰。初寺在翁洲南香柏巖。唐有僧慧超。相攸

築居峻潔厲行。居民傾信。寺遂以成。漢乾祐中。賜額曰崇福。至宋咸平。有真大師善持呪。能愈閭巷疾病。號真大悲。崇奉益廣。邑中尉曰丁漸。以柏巖峻絕。困登陟。易於廣平。環以九峯。繚以清溪。審勢辨方。各當其職。宋治平始。賜今額曰吉祥。紹興中。給事中黃龜年。以讜論忤時宰。避禍絕人事。僑居絕島。獨與方外交。每至寺中。時有宏智覺禪師主天童。宣密抉妙。師表藁林。其大弟子輝。主是山。傾動島嶼。黃公敬之。施所藏辟支佛牙。爲閣以庀。而寺益增重。遂爲海上寺。居甲乙。人稱之爲小天童。繇輝師始也。皇慶二年。火一師始作法堂。會遷它所。不果終。至是。柏居之首。建大殿三門。次以藏室僧堂。凡僧居之所宜營繕者。畢具。泰定三年。告成。俗姓虞氏。其父西發。嘗爲海運官。有兄曰庭桂。曰庭芝。慨然曰。吾不可不相吾弟。三世佛像。吾與弟共成之。今夫浮屠氏宮室。率爲禍福說。以誘民。陰奪其財。民日以耗。有國者憂之。若師所成。就不丐假於外。竭其贏餘。以復舊觀。怡愉相資。將瘁躬以究。築淩陰。廣腴田。以爲後人補緝費。志專念遠。是果能與其教者也。余誌釋氏建置。每有感於學校。若是則又重有所感也。師居淨慈。嗣法於慧禪師。屏外持攝慧之學。益有光矣。勉之哉。

妙果寺記

廬山東林寺。以遠法師爲祖庭。其教行乎海寓。閱年滋多。厯幻雜糅。壞宮夷址。將絕其遺教。寺僧普度。慨然興復。率弟子十人。芒屨草服。詣京師。上書演爲萬言。又集歷代經社緣起。作蓮宗寶鑑十卷。仁宗在東宮。閱其書。盡初帙。問曰。得無欲布施乎。合指謝不敢。又問曰。得無欲補僧職乎。復謝無是。想惟蓮教墜絕。

願殿下振復。時武宗皇帝在御。近臣以其事奏。即以詔旨慰撫如律令。至大四年。始播告中外。而度俾職其教。爲優曇主。師丹陽人。在縣爲竹林山妙果寺。率徒喻俗。將大廣其居。以稱聖天子崇重之意。予嘗謂象無形儀。域無遠邇。遠公之言曰。思專想寂。三昧之本。彼所謂邦國之殊異。相好之莊嚴。蓋將絕其邪惑。一淡泊而無所逢。大雄氏設喻警蒙。攝持示境。境由心發。境滅返真。清淨安樂。包括宇宙。是知道者。又安有四履之分別哉。度師博習教乘。示於衆者。類焉以導。其師日禪師。久居東林。後主天童。嘗率善士脩遠公法。來於江西者。踵不絕。度師與其教。是果能有傳也。記寺興造。摭其綱要。以明初志云。

### 石夫人廟記

州東北隅。有山昂然以尊。秀特瑰異。望之若貞女獨立。凜乎莫能犯。水旱祈祭。輒應。土人因其形似。而名之曰夫人山。唐咸通八年。主簿李成矩記其廟。貞固之封。見於祠部。嘉定十七年。加昭德順應。咸淳六年。加福祐。皇元合一郡縣。大脩祀典。茲山必預焉。泰定三年。州判官張思訥。承命致祭。肅瞻廟庭。棟壓瓴圮。心駭目瞪。折旋冥思。喟然有言。其何以稱上命。遂謀於州尹曰。蘇君。同知焦君。鼎。州判官塔海。復語其僚。俎毅許禋。割資以佐工役。而凡隸於祠下者。胥勸相事。是歲廟成。乞記於楹。原夫宓妃靜波。神女行雲。此騷人墨客之寄興也。二孤望夫。至今游覽者。羞言之。若夫天姥雲母。穹窿磊落。淫言鄙語。不能以入。是則茲山之靈。功在水旱。餘奚以議。傳曰。山澤通氣。記禮者曰。地乘陰竅于山川。炳靈赫奕。民社是依。崧高之詩。實有考焉。遂作迎享送神詞。詞曰。

磅礴兮上征。滄兮積兮縞。繒。樛木。矗兮翠旌。恍綏顧兮揚靈。抱貞固兮合窈冥。奇功教兮集鏤。墜。墮兮。棧。駿兮。烝烝。帝祀兮永承。其一來兮弗趾。去兮莫視。有穰兮億秭。祓不祥兮盪蕩。密石兮牲繫。俛精思兮帝制。百神擁兮森衛。苾芬歆兮歲歲。其二

信州自鳴山加封記

至元十四年。玄教大宗師張留孫。扈從世祖皇帝于兩京。言信州自鳴山神有靈狀。敢詣闕下。敕禮官崇顯之。是歲皇帝命侍臣李衆、劉子中、降香實銀奩。旂以金錦。顯其神。三十一年。成宗皇帝有詔。遣使致祭。嶽瀆在昔登載者。如式崇奉。大德三年。三十八代天師張□□平錢塘潮。言神以雲雨昭著。自鳴山事見郡乘。宋元符始有廟號。繇宣和迄咸淳。制書凡十五下。乞如今皇帝詔令。於是符于州。考證無異辭。至大三年。玄教嗣師崇文弘道真人吳全節。乃言曰。吾徒食茲山有年矣。闔闔摩盪。繫陰陽是資。變以行神。神繇以興。今天子禋奉祠祭。吾教益昌。自鳴於龍虎封畛。相入捨。是其何言。遂復請于朝。得加封爲明仁廣孝翊化真君。桷待罪翰林。十有五年矣。嗣師曰。龍虎紀述。吾不以累子。茲山胙蠻。紹定之際。先正肅公嘗紀之矣。子誠不得辭。桷嘗聞之地。秉陰山川竅焉。通而後能鳴。石之徵也。聲生於空。因山以著。昧其初而以爲神者。其諸異乎。石之鳴也。風靈流形。神始出焉。神非妄也。茲道之妙。老氏深知之矣。予何敢語。延祐三年四月會稽袁桷記。

宋開慶初。伯父賓州。我先考郡公。將除大父尙書公喪。相與議曰。崇親報本。唯躬行是先。焄蒿悽愴。鬱然而莫能見者。將導達之。則屈伸之義。足以考。聞諸老氏。有黃籙齋善攝度。彼果能濟。則吾父將超然于物表。非崇泥以求福也。齋旣成。以尙書公所遺祠部牒。度道士三人。王君德華在是選。二人皆亡化不復紀。獨王君服道士服。幾七十年。往來袁氏門。且五世。貴燄侈盛。嘗親見之。至枯泊頽齠。則過門風雨不少阻。且曰。吾寧負袁門哉。其於宜所學者。曰章奏符籙。雨暘疾疫。親究而遠扣。方外士來。質衣以請。百誑不倦。以其勤且無悔。故有所成就。今年八十有八。而請者益勤。迺語予曰。今卜藏于城西隅。名之曰隱仙。仙也者。返真之義也。魂升魄歸。死生之大義也。而釋仙者。謂爲不死。古果有是。若吾徒者。寧能企是哉。桷今年六十有一矣。考其入道。先於吾生。死者若蜉蝣。生者若稊稗。推一門之盛衰。足以驗一郡之興廢。而桷也以譴薄之技。獲官清朝。今仕焉而止。願與王君考游歷之舊。指其歸藏。則曰。委順觀化。寧有怛於心。懼後人不能以紹志。俾預書平昔之出處。且以勵于後。今主焚修于玄妙。聰明不衰。壽益未艾。家世定海縣。自號曰蓬山。志不忘初也。泰定三年四月甲午。見一居士袁桷記。

### 通玄觀賈道士記

通玄觀道士賈志福。年八十三。化于其居。有徒曰王道深者。言曰。吾師以不言爲宗。其學澄寂寡約。不爲翕翕詭幻。楮衣草屨。寒暑自得。有問其道者。不以對。機藏籥啓。指喻微密。若口授而耳屬也。始爲汝南民。弱冠得法於棲雲王真人。王曰。知者不言。子游四方。能果不言。以自全乎。後游南陽。遇軍帥。脅以語。不對。

復辱以箠。師正色畫地作無語二字。軍帥竦愧。謝以白金。將築室奉之。會得間。走京兆。復遇其師。曰。汝志已完。忍辱易。忍寵難。其居京師。以觀子之有成。於是迄歸於京師。會有數薦于先朝者。復卽遁去。然居通玄而號清靜散人。實洞明祁公之所強也。又曰。師少時嘗得奇疾。夢一老人授以七桃。食之寤而愈。其徵家爲道士者凡七人。有弟曰德常。亦守其學。今居大名之嶽祠。韜靜完絜。與吾師無異。願有述以廣其道。迺爲之詞曰。

繫摩兜韃。厥機孔艱。維柱下學。知者不言。納息于踵。養神于淵。匪曰不言。其道已完。道豈文傳。文實累智。虛辭借浮。一跌千里。竊陰據陽。詭立名字。夸者逐魂。固者死技。睠此嗒然。奧密是造。不懈其躬。不喪其寶。心焉死灰。頭若蓬葆。藏明委順。是曰至道。翩翩二難。孰去孰存。厥徒允從。匪私其溫。恍焉松聲。彼聽莫聞。勵爾後人。永矢勿諼。



# 清容居士集卷第二十一

序

## 易三圖序

上饒謝先生遜於建安。番禺吳生蟾往受易焉。後出其圖曰。建安之學爲彭翁。彭翁之傳爲武夷君。而莫知所授。或曰。託以隱祕。故謂之武夷君焉。復曰。吾易神也。易何爲而神也。神者。易之始也。易不可以強名也。不名則亡。易願敍其旨。袁桷曰。夫亡易者。非聖人之本旨也。神以合聖人之易。斯得矣。然則曷爲神。無端而莫可見也。惟無端焉。故無體焉。存而明之。而數以生焉。數生矣。而始有變。變立矣。而會以理。理者其一也。理不能以盡易。因數以立者。理也。用變以逆者。非理也。故曰。陰陽不測之謂神。始晁以道紀傳易統緒。截立疆理。俾後無以僞。至荊州袁溉道絜。始受於薛翁。而易復傳。袁迺以授永嘉薛季宣。士龍始薛授袁時。嘗言洛遺學多在蜀漢間。故士大夫聞是說者。爭陰購之。後有二張曰行成。精象數。曰續。通於玄。最後朱文公屬其友蔡季通。如荊州。復入峽。始得其三圖焉。或言洛書之傳。文公不得而見。今蔡氏所傳書。訖不著圖藏其孫抗。祕不復出。臨邛魏了翁氏嘗疑之。欲經緯而卒不可得。季通家武夷。今彭翁所圖。疑出蔡氏。惜彭不具本始。謝先生名字。今不著其終也。世能道之。

## 易集傳序

觀象畫卦。庖犧之本旨也。因言意而廣象焉。三聖人之本旨也。王弼後出。附小象以言理。儒先莫能病。若繫辭傳說卦等篇。弼莫能措辭。審是則弼幾一偏矣。十翼之作。有象焉。有象焉。專於理而作象。象傳焉者。夫子之志也。然則文王周公之象。象其悉皆理與。曰非也。卦本於象。八卦首之。定名以爲象。則井鼎小過是也。言意以爲象。伏羲言而人不能知之。文王周公始申言之。文王之言見於象。周公之言見於爻。是則不俟予言也。易有聖人之道四。象象傳果唯言意焉。則變占乎何取。曰有變焉。有占焉。伏羲畫不變。於九六則變。見之占。則文王於象。附言之。象未始分。文王始離之。變之疾者。莫先於蠱。憂世之深也。若分象則師。晉小畜之類是也。爻變於占。因筮以見者也。其即見者。漸小畜訟之類是也。象爻合四者而言之。夫子不一言之。何與。曰傷哉。夫子之志也。事莫尙乎辭。辭非理不能以定人事。吉凶繇妄而咎以興。先之以變占。是易殆卜筮之書矣。器繇動成。動斯靜矣。取靜觀動。將於是乎。則斯其爲象也大矣。夫子於說卦焉。始彙之。彙以窮其變。占則變占者。筮之始也。故其首章先於著。二章次於卦。先天之說。七言之。懼溺於占也。後天之說。一言之。人事之本也。而終之以象焉。維昔康節邵先生。作方圓環中圖。合於天人。皆本說卦。充類以至。知夫聰明特達之士。不在於諄告也。若繫辭傳設卦之方。窮神之妙。其詳於爻者。毫釐不能以易。積數以成。變易以動。肇於方寸。散於六合。幽眇廣大。取而莫窮。應而若遺。因卦以測。善算喻者不能窮也。舉世舍是。矛盾互持。雖百世莫能以解。吾故曰非繫辭傳不能以知易。是說也。邵子之說。非僕之說也。桷不佞。讀易二十年。歲月逾邁。所見益懼。紆石烈君希元篤志嗜古於易。精思以求。搜摭疑義。私嘗歉然。莫

能以對。卒能先予以成書。不鑿以求通。不拘以強附會。其粹精足以垂世。故以予昔之所告。冠於篇首。俾知夫同焉以異者。將以革夫株守偏弊之失。則予之所著。其果有同乎。其無同乎。

### 新安程子見四書圖訓序

象數可以圖言。名意不得以圖言。以圖言之。其亦有所本乎。昔者聖人觀象著圖。因圖爲書。範圍發揮。由書而始通。則夫圖之祕。非書不能以盡。是書之明於圖者也。後聖繼述。遵文演圖。器度物象之微。剛柔善惡之應。若天旋之默運于樞紐。其不可以繪畫得之者。猶因名以立義。此圖之輔於書而不可廢焉者也。二者之用。各有先後。合而言之者。吾不知其說也。自正心誠意之說興。茫無畔岸。朱子憂之。遂以其可據依者爲之主。而體用知行之說。實切於學者之功用。後百餘年。五經廢棄。遂復勦取其近似。端坐塗飾。而根柢源委。悉不復攷。禮主於敬。理主於善。一言以蔽。講學之法。糜爛而不可救矣。新安程子見取論孟中。庸大學之書。切於吾身者。析而爲圖。以輔翼朱子之教。抑亦使夫人知爲學之敍。非字義之可盡。條分目舉。必有能篤行而親識之者。斯足以盡夫斯道之要。其勤且備。可謂能矣。昔真文忠公作讀書記。仁義性命之說。各以類從。先正肅公作書止之曰。使若書成。學者將得以自肆。今是書具在。視今之言理者。與古賢無異。論其所學。則又甚於朱子之憂矣。子見之圖。其必有以拯諸。

### 輔漢卿先生語孟註序

解經莫嚴於聖賢。見於語孟。其語簡。其旨明。子思之釋經。尤得聖人之微旨。今其書具在也。自漢傳註之

學興。蔓辭衍說。浸淫乎萬言。魏晉一切掃削。明理之說。歸乎空玄。二者之弊。遂淪於偏滯。學者昧昧無所依憑焉。踰千有餘載矣。至宋春陵碩儒。開伊洛之緒。正說至道。粲於簡冊。良謂大備。後朱文公出。懼其剽竊之近似也。源同而派別之。統宗據要。蓋將使夫學者不躡等而進。若律之有均衡之有權。不得以錙銖差也。既又懼其疑之未釋。復爲問答以曲喻之。其詳且盡。不復可以有加矣。書大行於天下。而後之師慕者。類天台釋氏之教文。旁行側注。挈綱立目。茫乎皓首。不足以窺其藩籬。卒至於聖人之經旨。莫之有解。日從事于口耳。孩提之童。齊襟拱手。相與言道德性命者皆是也。桷幼承父師。獨取黃輔二先生之書而讀之。黃公之書。嘗輔翼其未備。若可疑者。則以昔之所聞於先師而申明之。至於輔公。則直彰其義。衍者隱之。幽者暢之。文理炳著。不別爲標的。以盡夫事師之道。微文小義。簡焉以釋。經爲急。而其知行體用之說。不蘄合而有合矣。二公所爲。是誠有益於後世。而今世補文公之遺書。夸多務博。雜然前陳。莫知揀擇。余獨病之。合黃輔以傳。則文公授受之旨。益得以遠。輔公書。其子季章舊刻於武岡。兵禍散軼。今其從孫政。與其子華亭丞友仁。相與謀曰。遺書不傳。吾輔氏子孫。責曷敢緩。遂刻先生之書于家塾。俾序其事。予獨連言於黃公者。將使夫後人知二公爲文公親授。黃公之澤已斬。輔氏爲未墜。是可哀也已。是可嘉也已。願勉哉。正學之興。其必在是也。

郭好德論語義序

唐儒作五經正義疏。必先之以衍義。而始明其傳註。其先之者何。懼汨於經也。釋之以義疏焉者。有訓詁

焉。有制度焉。至於名物象器疆理飛走潛動之辨。不博不足以盡。約之以衍義。非背於傳經之說也。理唯約足以見。漢稽古三萬言。後世嗤之。至朱文公承濂洛之正傳。始爲語孟精義。久之憺然曰。宜尊所聞。今所傳集註。具訓中外。下逮荒陬絕島。家有而人誦。文奧義古。至於不揣者。斷章譏駁。識者哂之。京兆郭君好德乘驛。父授徒于其鄉塾。懼世之不達於辭者。習譏駁之病。撮其精微。合於簡易。將使夫初學者。若遁塗以進。遇險以休。使少窒焉。必由是而達。在易之蹇曰。險而能止。知矣哉。蹇斯通矣。抑嘗聞文公之教於其家也。謂集義之作。義理詳而訓詁略。別爲一書。曰訓蒙口義。今此書不存。乘驛是書。殆深得文公之意。近世東南諸儒。旁行側注。鄰於釋教之學。濫觴而不可禁。予得讀是書。深有合夫訓蒙之說。孔賈遺旨。能以遠紹。其不在茲書也歟。

龔氏四書朱陸會同序

五經專門之說不一。既定於石渠鴻都。嗣後學者。靡知有異同矣。易學以辭象變占爲主。得失可稽也。王輔嗣出。一切理喻。漢學幾於絕熄。宋邵子朱子震始申言之。後八百餘年而始興者也。春秋家劉歆尊左氏。杜預說行。公穀廢不講。啖趙出。聖人之旨微見。劉敞氏。葉夢得氏。呂大圭氏。其最有功者也。尊王褒貶。則幾於贅。是千餘年而始著者也。書別於今文古文。晉世相傳。馴致後宋。時則有若吳棫氏。趙汝談氏。陳振孫氏。疑焉有考。過千百年而能獨明者也。詩本於大小敍。諸家詩已廢。毛公說尊。獨蘇轍氏始刪。鄭樵氏悉去之。朱子祖之。此又幾二千年而置議焉者。三禮守鄭玄氏正義。皆旁正曲附。唐趙匡氏始知其非。

宋諸儒駁鄭。幾不能以立。甚者疑周官非聖人書。卓識獨見。雖逾千百世。亘萬古而不泯。是則寧能以一時定論爲是哉。曩朱文公承絕學之傳。其書敍疑非西京。於孝經則刊誤焉。詩去其敍。易異程氏。中庸疑於龜山。楊氏。程楊。朱子本以傳授者也。審爲門弟子。世固未以病文公也。陸文安公生同時。仕同朝。其辨爭者。朋友麗澤之益。朱陸書牘具在。不百餘年。異黨之說興。深文巧闢。而爲陸學者不勝其謗。屹然墨守。是猶以丸泥而障流。杯水以止燎。何益也。淳祐中。番陽湯中氏合朱陸之說。至其猶子端明文清公。漢益闡同之。足以補兩家之未備。抑又聞之。當寶慶紹定間。黃公榦在朱子門人。不敢以先人所傳爲別錄。黃旣死。夸多務廣。有語錄焉。有語類焉。望塵承風。相與刻梓。而二家矛盾大行於南北矣。廣信龔君霆松。始發憤爲朱陸會同。舉要於四書。集陸子及其學者所講授。俾來者有攷。刪繁蒼精。余於龔君復有望焉。夫事定於千百年。則罔有異論。故歷舉興廢之說。若是。噫。龔君之書。有俟夫後。若余言亦殆將得以同傳也。至治二年八月辛未袁桷序。

五經約說序

古之學者。三十而五經立。方其時。以力田致養爲先本。春出于野。冬始入邑。其勤懇懇然。日不能給。暇日入學。歲率不滿十旬焉。噫。何其敏且成如是之易也。蓋先王盛時。鄉遂溝洫之制明。冠昏賓蜡之禮具。絃歌俎豆。鐘鼓弓矢之事。周旋品節。皆身親而日化。則所謂通其義者。道德性命之理也。簡牘日繁。專門經師。夸宏務奇。漢世儒者。白首莫一。微言旣絕。掇拾枝蔓。而媮意惰業。率自涯而返。良有以也。夫子之翼易。

二戴之傳古禮。解經之準的也。訓詁別立爲小學。析文以言字。因字以生義。究其大較。選不相入。然則士何自知經旨哉。唐孔賈氏尊漢儒宗。知其迂陋。猶旁諱曲覆。如臨師保。不敢有犯。獨啖趙出口。指摘無所避。至劉原父氏。歐陽氏。始慷慨直論。未幾言經者。銖分毫別。疆畫同異。亦駸駸乎漢儒矣。夫一道德而同風俗。作者之事也。復古而不至焉者。儒者之責也。六藝之道。莫急於禮樂。樂書廢已久。而儀禮迄不得立。學官遺音舊器。莫可尋辨。登降進退揖讓之損益。臨事取具。跂就企及。卒泥夫近古。吾獨謂學古之士。猶足以語夫此也。廬陵宋元翁。爲童子時。能明經。明經舉廢已久。獨元翁興起其事。弱冠復約爲大義。先王墜典。炳然其專美矣。夫天人之奧。昔人之所罕言。而昔之耳聞目見。接熟素履。今皆棄置不講。元翁氣清德茂。養泉糞木。必以源本約而同之。與道俱會。後之學者。將由是則焉。敢誦所聞而美之。

鄧淳翁春秋集傳序

因褒貶而傳春秋焉。聖人之餘意也。悉貶而遺其褒焉。非聖人之本旨也。粵自周室既遷。史列於諸侯。典策之藏。世莫得見。而其紀載之法。號稱近古。故凡是非善惡之實。天災時變之著。直書而不隱。逮于戰國。執簡侍史者。猶守而未墜。然而攻劫凌據之侈。相尋而莫之顧。實由夫外史之職。不行于邦國。其史之存於國者。又將日幸淪棄。而無所傳證。故益得以逞其驕而恣其所行。若是者二百餘年矣。聖人始出。然後因其史之本文。而修明之。別爲之書。以信于後。善乎孟子之言曰。孔子成春秋。而亂臣賊子懼。若是則春秋其果爲褒貶哉。三家之傳。事與義例。轆轤殺案。刻者若法吏。博者若辯士。上下二千餘載。各執所嗜。介

不相竝。而玩獵蒐擇。髣其音聲。益遺其形。傳愈疏而經益湮矣。夫因義例以明聖人之意。懼義與例不得而盡。廣其記聞。不燭於理。則事益無以自附。春秋之道幽而明。無傳而著論。至於是。良有以也。自唐以來。合三傳者。始各以其長自見。然而求於外者。必謹於內。純明粹精。非自外至焉者耳。先王之典禮舊章。具於傳記。悉心以推之。闇而日彰。墜而復完。則禮者。又春秋之標準也。邵武鄧淳翁。慨不行於今。特立己任。纂而爲編。復因胡氏七家而增廣之。余嘗謂審乎人情。酌乎事變。非春秋其誰準。感而通天下之故。則易之用。其與是相竝。始於春秋而終於易者。邵子之學也。淳翁學首於是。必有其本。敢因以訂諸。

王先生困學紀聞序

世之爲學。非止於辭章而已也。不明乎理。曷能以窮夫道德性命之蘊。理至而辭不達。茲其爲害也大矣。是故先儒有憂之。且夫子之言有曰。興於詩。立於禮。成於樂。其品節備具。見於禮之經解。夫事不燭。不足以盡天下之智物。不窮。不足以推天下之用。考於史冊。求其精蘊得失之要。非卓然有識者不能也。若是其殆得之矣。在易之居業。則曰脩辭立誠。而畜德懿德。必在夫聞見之廣。旁曲通譬。是則經史之外。立凡舉例。屈指不能以遽盡也。揚雄氏作法言。其意亦有取夫是。後千餘年。禮部尙書王先生出。知濂洛之學。淑于吾徒之功。至溥。然簡便日趨。偷薄固陋。瞠目拱手。面牆背芒。滔滔相承。恬不以爲恥。於是爲困學紀聞二十卷。具訓以警。原其旨要。揚雄氏之志也。先生年未五十。諸經皆有說。晚歲悉焚棄。而獨成是書。其語淵奧精實。非紬繹玩味不能解。下世三十年。肅政司副使馬速忽公。僉事孫公楫濟川。分治慶元。振起



儒學始命入梓。桷游公門最久。官翰苑時。欲悉以其所著書進于朝廷。因循不果。今也。二公謂桷知先生事爲詳。俾首爲序。庸書作書之本旨。亦以厲夫後之學者。先生諱應麟。字伯厚。自號深寧居士。泰定二年冬十月。門人具官袁桷序。

### 大易通義序

郡侯郭文卿示易通義一帙曰。此真定侯先生所述也。先生幼喪明。聆羣兒誦書。不終日。能悉記其所授。稍長。習詞章。自謂不學。可造詣。旣而悔曰。吾明於心。刊華食實。莫首於理。理以載道。原易以求。則爲得之。於是精意讀易。旁通曲會。參以己說。而名之曰通義。讀其書。浩乎其詳也。簡乎其著也。因理以測象。若遺焉。而不敢廢也。桷學易。蓋亦有年矣。原夫八卦旣列。象斯立焉。故卦有理者焉。有象者焉。理有以言爲象。象有以理爲用。理與象不得而偏也。聖人懼其言之雜也。諸卦之象。專言夫理。而取身取物。悉見於爻辭矣。又懼夫設卦之理。象不足以盡也。復繫之以上下傳。而其象位之明著。悉見於說卦。至矣盡矣。後之儒先言理者。過於浮略。象廣喻。而泥象者。微言隻字。咸取以爲象。角立交病。三聖之旨。泯然莫知所歸。自朱文公發變象之說。學者始知所宗。君思深而識幽。據會提要。蓋將爲程子之忠臣。做文公以入夫邵子之室。非潛心尊聞者不能也。今年逾九十。康色未艾。先生名克中。字正卿。郭侯俾敘其書。將入于梓。不讓而爲之序焉。

### 老子講義序

昔之善言老子者。謂其同者合於易。其不同於孔子者。皆矯世之弊。此論千萬年不能以易也。新安程泰之作易老通言。余意深得其旨。讀之茫然不能以脗合。語簡則理得。大羹玄酒。夫豈旨於味乎。老子之五千言。不得已而爲言也。道爲乾坤之體。德爲咸恆之用。釋其辭旨。觀妙觀微。見天下之蹟而擬諸形容者也。衆妙之門。易之門也。功成弗居。治蠱之道也。使民無知無欲。百姓日用而不知也。挫銳解紛。洗心藏密之旨也。多言數窮。吉人之辭寡也。谷神不死。生生之謂易也。後其身。外其身。以前民用之道也。水善利萬物。坎之行有尙也。持盈揣銳。君子有終也。生而不有。爲而不恃。無思無爲也。埏埴爲器。戶牖爲室。十三卦制器之義也。有之以爲利。無之以爲用。民咸用之謂之神也。爲腹不爲目。觀我朵頤之凶也。寄於天下。託於天下。知進退存亡而不失其正者也。迎之不見其首。隨之不見其後。神無方而易無體也。善爲士之章。出入以度。無有師保。如臨父母之謂也。觀復復其見天地之心也。皆謂我自然。不事王侯。高尚其事也。若夫十八十九二十章。矯世之言也。其中有物。其中有精。坎離之體。未濟既濟之用也。不自伐。故有功。謙之義也。有不信焉。亦矯言也。跛者不立。鼎折足。不勝其任也。有物混成。易有太極也。輕則失臣。躁則失君。君不密則失臣。臣不密則失身之義也。善人者。不善人之師。益道也。知白守黑。窮神知化之義也。去甚去奢。去泰。致恭以存其位者也。將軍居左。師左次。无咎也。道之在天下。變動不居。周流六虛之義也。自知者明。顏子之不遠復也。白勝者強。君子之自強不息也。終不爲大虛以受人也。視之不見。聽之不聞。極深而研幾也。不疾而速。不行而至也。柔弱勝剛強。坤至柔而動剛也。利器不可以示人。君子藏器於身也。守萬物

將自化。神而化之。使民宜之也。上德不德。章矯言也。謂得一者。貞夫一者也。萬物生於有。有生於無。蔡氏曰。兩儀之先。其易無體。兩儀之後。其易有體。有無之義。於斯見之。明道進道。探賾索隱。鈎深致遠之謂也。道生一。一生二。二生三。三生萬物。石林葉氏曰。易之數。見於大傳者。乾坤之策也。物亦非萬之所能盡。該微見其緒。曰引而伸之。觸類而長之。天下之能事畢矣。老氏言數曰。道生一。一生二。二生三。三生萬物。莊周言數曰。一與言爲二。二與一爲三。自此以往。巧曆不能算。老氏所謂三生萬物者。猶易之言當萬物之數而不盡其說也。莊周所謂巧曆不能算者。猶易之言引而伸之。觸類而長之。而不窮其變也。至漢言律曆者。於是始於易數之外。起黃鍾之一。而三積之。至於十七萬七千一百四十。有以爲五行之數。備已而又爲三統之說。以五行相錯。由三微三著積之。始於太極。而終於二千三百六十三萬九千四十。而復於太極上元。以爲天下之能事畢。無爲老子之旨。義與生而不有同。旨旣同。則無思無爲之義同矣。知足不辱。知止不殆。諸卦之上九類之。清靜爲天下正。憧憧往來之反說也。知足常足。繫于苞桑也。其出彌遠。其知彌少。稱名也。小取類也。大之義也。爲學日益。爲道日損。兼損益而言也。懲忿窒慾。損也。見善則遷。有過則改。益也。聖人皆孩之。退藏於密。吉凶與民同患也。善攝生。老子之本旨。致一之義近之矣。道生德畜。乾坤之用也。生而不有。變化云爲也。塞其兌。言行君子之樞機也。慎言語。塞兌之本也。閉其門。行其庭。不見其人之謂也。介然有知。知微知彰。知柔知剛。介于石之義也。善建者不拔。確乎其不可拔也。脩身至天下。中庸之論也。精之至。和之至。男女構精。化生之道也。玄同。不見是而無悶也。以奇用兵。以此毒天下而

民從也。禍兮福之所倚。頌果不食也。福兮禍之所伏。繫帶之三褫也。治人事天。莫若嗇卑而不可踰。貳簋可用享也。有國之母。可以長久。安土敦乎仁。愛之道也。非其鬼不神。睽之羣疑亡也。大國取小國。小國取大國。湯文王是也。謙之上六得之矣。道者萬物之奧。廣大悉備也。何棄之有。容民畜衆也。坐進此道。藉用白茅。无咎也。圖難於其易。爲大於其細。易簡而天下之理得矣。爲之於未有。治之於未亂。履霜。堅冰也。合抱之木。生於毫末。喻積小以高大也。下二章亦同也。民之難治。以其智多。禁民爲非曰義。則智去矣。江海爲百谷王。天水違行而由一以生也。下者水之道。需而蹇。蹇則通矣。下濟而光明之義得矣。曰愨。天地之大德曰生也。曰儉。損之道也。曰不敢爲天下先。巽以行權也。善爲士。夫子於益或擊之。立心勿恆凶之爻。詳言之矣。用兵有言。仁者無敵也。吾言甚易知。易知則有親也。知不知。滕口說也。民不畏威。不威不懲。滅趾滅耳之爻得之矣。勇於敢則殺。天道虧盈而益謙也。民之饑節。以制度。則不傷財不害民矣。人之生章。原始反終。故知死生之說也。天之道。其猶張弓。日往月來之義也。天下柔弱莫過於水。坎之內爻。堅強者也。故險之時。用大矣哉。受國之垢。國君含垢也。明夷之義。於斯見之。常與善人。積善之家。有餘慶也。小國寡民章。通其變。使民不倦也。利而不害。乾不言所利。保合大和。乃利于貞矣。爲而不爭。爭地爭城。老子之親見也。王侯設險。以守其國。夫豈有爭哉。予固嘗以易釋其旨。而未有成也。同里呂君與之。故儒家。閱世益深。游於方外。以其著老子一編見示。甚似夫子之所見。其文詳順而實。援據以精。築室於海島孤絕之地。黜聰窒明。以養其泰和。且又將窮極山川之幽勝。以求正於有道。誠可謂老而能學者也。故輯舊說列

于前。凡我同志。知予之不安許可者有在也。泰定二年七月。清容居士袁梅序。

### 高一清醫書十事序

班固氏輯劉氏七略爲藝文志。其序醫經方藥。終以神仙十家殿之。尋宗探本。厥旨深祕。近世習老氏者。則以爲薄清淨務名實。若班氏去取未足爲吾學輕重。其不習老氏者。因其先後。遂以爲尊吾聖人。莫若班氏。緣聲附響。深切明著之道。二者皆所未喻也。醫經方藥。具訓于先古。其不得已而爲之意。世莫之曉。惟空林隱竇。刻意繕性之士。必極其本致。而後能知之。故其察五行乘剋之理。七情靡盬之原。兢兢惴惴。使夫身不至於已病。而餘功後效。積精以適神者。斯近夫神仙之說矣。班氏深存其義。而隱其說。故世之方士。皆荒忽詭幻。復別爲一家。以自侈靡。而所謂非聖不言者。則有戾五福之彝訓。仁者靜壽之義。於道何取焉。予嘗謂有經天下之志。必有經天下之事。胼胝之勞。在陳之厄。其飢寒困苦。雖九死不得以自悔。視夫彈冠結綬。爭奪得喪。談性命之空。而忘事理之實者。則有間矣。故每信而不敢自異。居里時。獨高君彭一清。慕方外學。嘗以爲醫經爲性命之本。若冶金鍊石。諸祕詭事。皆不取。殫極年歲。悉取上古漢晉諸經方。以及唐宋所續出。經分緯別。定其精良。刪其繁雜。別爲十事。謂必由此足以通夫仙道。而其意與班氏適相脗合。高氏衣冠爲四明望。自獻簡公閔掌成均。定學制。當秦氏廢錮正士。卽致事。以春秋禮學教授鄉里。內翰公文虎。禮部公似孫。父子皆以文學致清顯。至大宗伯衡孫。爲端平正士。脩儀偉貌。年八十餘。手抄見聞及方技諸書。疊疊道舊不輟。一清爲諸孫。得於宗伯爲多。淵懿之深。簡聞小誦。非所可擬疑。

駸駸乎與學仙之道通。故今自號爲通仙子云。然予幼聞諸老言。葛天民曾景建。以神仙說游公卿。滯言玉雪。苦意冰蘖。見者憐而欲成之。後卒不就。最後里人王丹池。復以是說游亦不就。十事之成。於吾徒誠有賴。未知通仙之本旨。其果能有成也。朱文公於老氏。嘗曰。恐逆天理。信而不泥。然未始與浮屠者同其議。悼日月之如流。知玄髮之易化。高君其奚以辭。因敍而致意焉。

四明志序

成周疆理之制。審於王畿。首合同姓以夾輔。至於四履。則必假異姓焉。以控遏之。先後疏附。曲盡其制。何周且詳也。四方之志。猶懼其不能以悉知也。則必以外史掌之。社亡入秦。而書具在。區區刀筆吏。獨能收其書。據要漢中。夫豈偶然也哉。世祖皇帝聖德神武。混平寰宇。首命祕書監儒臣。輯大一統志。沈幾遠略。與昔聖人意旨。昭合。然而郡志缺落。其遺軼未備焉者。不復以徹于上。馬侯澤潤之。固嘗爲中祕官。知之矣。暨守四明。乃曰。明舊有志。今爲帥大府。浙東七州。推明爲首。阨塞戶版物產地利。是宜究察。以待問。清風舊德。與昔之高閎巨闕。屬於宅里者。猶可考也。謂桷久爲史官。宜有述。桷嘗聞之。洙泗遺俗。稽之以久遠者。道德之澤也。詫錙銖之利。以害于吾民。昔人之所不道。空虛說增。農日益困。甚者紀其山林屋室之盛。奉書詣庭。若執符契。爭莫能已。是殆昔之無知者。根其禍也。管夷吾作書。訓子弟良厚。而內政以漁鹽爲急。儒者詬之。維明負山橫江。歲厄於水旱。河渠是先。牧民之本。推其沿革。覽其山川。知昔時得人之盛。宮室戶口之無恆。釋道遺文之盛衰。是皆足以增其永歎焉者矣。乃爲十二考。以志其事。遂不敢以荒落。

而有辭也。馬侯爲政，愷悌惻隱，以宜于民。民以不病，郡博士吳君某、勤恪承令，詢索州縣之所宜聞者，良備。因是得以成書焉。

### 李景山鳩巢編後序

桷過永嘉，張宗魯書塾。皮河間李景山氏，手校朱子詩傳，謹視之，旁行側注，朱墨定竄，精善心慕焉。雖未熟詳知其名，能詩，吾意非近世詩士也。近世言詩家，頗輩出，凌厲極致，止於清麗，視建安黃初諸子，作已憤憤不復省。鈎英掇妍，刻畫眉目，而形幹離脫，不可支輔。其凡偶拙近者，率悻悻直致，棄萬物之比興，謂道由是顯，六義之旨闕如也。是歲冬，見于京師，始讀其詩於雍虞德生，質而不倨，綺而不踰，襲衆芳之英，融寄于窮厓絕域之地，而審其昔日之心滿意肆，蓋將沖寂寥廓，脫然以逃焉者也。夫子之言曰：詩可以怨，然不怨可也。怨已則責難於天，誠不怨邪。幽蘭之辭，湘纍之賦，得而廢之矣。若公之詩，非悲其不遇也，凜焉以持者正也。反而言之，斯怨矣。又何病焉。予嘗從問雲南土風，歲弄兵不止，計安出。公曰：理則人擾，則獸豈獨雲南哉。退已書諸牘，復識于序後。若德生所論次者，不復著。

### 劉內翰文集序

至元二十四年間，南康劉公爲內相。宋社未亡，桷髫年侍先處州府君子錢塘，獲識之。議論雄偉，誠奇士也。後有客自京師來者，必詢其詞命制作，多懽悅不能道。踰十餘年，獲入禁林，得玉堂制草而讀之，編次荒略，詞臣之名，十不存四五。是則劉公之文，無因而推考焉者矣。至治元年冬十月，其嗣判官君某，橐其

遺文相過焉。俾有敍。桷讀之。手不以釋。夫集腋於裘。擣珍於鼎。非精別者不能也。尊其所聞。足以信後。諛言美說。非後進之所宜爲也。東平李公謙評公之文曰。學問該洽。性理精詣。承旨王公構則曰。深妥雄健。博碩光明。廣平宋公渤亦曰。氣盛辭卓。溫縟宏雅。嘉禾張公伯淳則又曰。浩蕩橫逸。是數公者。司衡挈繩。將俾夫後之學者。翕焉以從。其傳信何疑矣。夫以理爲主。文常患於不工。雕鏤委心。茫然而無以畔岸。是則爲是者良難矣。命焉而得所遭。事久則論益定。觀其詩文。於當世羣賢之言有考焉。斯得矣。

樂侍郎詩集序

故吏部侍郎河南尹樂公詩一編。其季子克誠以家集散軼。守其記憶者得若干篇。將刻于梓。俾有敍。桷讀而作曰。嗚呼。旨哉。方南北分裂。兩帝所尙。唯眉山蘇氏學。至理學興而詩始廢。大率皆以模寫宛曲爲非道。夫明於理者。猶足以發先王之底蘊。其不明理。則錯冗猥俚。散焉不能以成章。而諉曰。吾唯理是言。詩實病焉。今夫途歌巷語。風見之矣。至於二雅。公卿大夫之言。縝而有度。曲而不倨。將盡夫萬物之藻麗。以極其形容贊美之盛。若是者。非夸且誣也。五經言理。莫詳於易。其辭深且密。闡幽顯微。不敢以直易言之。考於經皆然也。宋之亡也。詩不勝其弊。金之亡。一時儒先。猶秉舊聞。於感慨窮困之際。不改其度。出語若一。故中統至元間。皆昔時之緒餘。一一能有以自見。若吏部公則親受承安貞祐之傳。故其詩清切俊邁。足以振數百年之遠響。俾置諸中州之所編次。其何能以辨。公諱舉。字用之。號藏齋。與父運副皆金進士。家世源委。所從來有據。傳以永久。孰曰不宜。



曹邦衡教授詩文序

大江以南地爲荆揚郡不過百十其言語風俗起居飲食之異邈不相近世方理文治而士大夫言詞章高下復人人殊數十年來文益媮體益弊乘高駕浮滑稽恣睢恍乎其不可詰絜而至於道者不懼則債遡源而論之蓋方承平時師表日增士以其類至尊其所傳過於自守而樂凡近者尤矜矜然祕重不妄與一道德而同風俗先王之教誠不若是也余嘗會文於同志反復力議而卒以自病廬山曹邦衡客京師三年矣閉門弦歌絕造請之跡顧屢察之而卒未之與議將行始示其詩文一編蒐奇稗精炳然而橫陳列懸于簾擣珍于鼎聲味相屬而凌厲感悱蓋將合律呂之變適酸鹹之宜者也夫不自是其是必有則於古守其私說不能以自廣將固且隘博以求之精以思之日遷而歲異當於是乎益今四海一國士之不可強爲者猶跛而及文教之治由是而一曹君勉乎哉往慎乃塗正轅而行其寧有不至者耶



# 清容居士集卷第二十二

序

韓泗州老人詩序

往八十年。金蹙于汴。盡汴民咸勝兵。抗鬪不得息。聞其父老。泣撫黃稚。謂不幸生亂離。使言承平時。疑卒未見。果承平耶。余弗得見。得見焉。必若等也。不十年而金亡。又四十年。世祖一轍迹。郡縣轉輸。屯戍徭徵。江以北悉撤省。而汴爲樂土。今三十年矣。私怪當時父老言合龜卜。特不知得年者幾何人。又不知得年而果佚樂者爲何如人。夫壽與富天不能竝畀。錙銖之較。願與計莫以勝也。大德丙午。韓泗州君美書來京師曰。余家嚴君。偕老于汴。俱八十矣。桷與泗州交最深。官於吾鄉最久。與之言文詞。道政事。切直近實。今守於泗。泗與汴水陸相望。甘旨致問不絕。汴總河南十數州。得領公府事。上汴奉觴跪行。盡其私歡。二老人方彊明艾和。游戲閭里。登坡陁。極榛翳。臨車飛礮。動在耳眼。嘗指而慨已。而以喜。而泗州又能清謹愷悌。祝其神明。以養其志慮。休休焉。不知其將耄。古之所謂陶唐氏之民者。於韓氏見之矣。中都之士咸美而賦。四明袁桷爲之序。

張氏宗譜序

宗以族言。斯古也。別以爲宗。記始也。大宗非諸侯之制也。居小宗而遺大宗。自鄭氏大記之。釋失之。缺其

大宗。小宗乎何取。然則曷爲大宗也。大宗之法。不施於庶昆弟。謂之別者。大夫學士悉有宗也。天子以國諸侯以封。世守其祀。莫敢爲宗。下于庶人而言宗焉。遺其大宗不可也。大夫士有常宗。由大宗而爲小宗。小宗不可以承祖。故分而言之。小宗之嫡。斯大宗矣。此繼別之義也。張氏之各得爲宗也。奈何。張譜始於東平。東平其大父善也。東平之長子禮。爲豐縣丞。豐縣。東平之大宗也。其季義。居於東昌。死復葬焉。有子五人。長曰叔溫。爲高沙屯官。東昌之大宗也。古者適於他國。皆別爲宗。國一而地異。別之義斯近矣。張譜軼於兵。迎而數之。首豐縣之禰。悉張氏子孫。更數百年。宗不能易也。高沙之禰。居東昌。合豐縣爲小宗。始高沙爲大宗。宗各有別。尊祖之道斯備矣。張姓出于姬。至周而氏。著祖于韓。其得望者十二。曰襄陽。洛陽。河東。始興。馮翊。吳郡。平原。清河。河間。中山。曰魏。曰蜀。東平譜祖以上。名不得而次。合賢與貴。侈而書之。失近據遠。譜其疑矣。惟貴與賢不偕同也。誠貴矣。非賢不能傳。使果賢邪。雖弗貴焉可也。張氏之先墓。隕於河。族厄于逃。今其孫若曾。咸曰別爲始者。猶邇也。至東昌而復別。何敢忘之。太和之季。叔恭敬父。則曰爲譜辨宗。百世猶今也。且昔之不幸。吾猶慊慊焉。敬父之心。思而深。肅肅然念其先。敏儒以自持。其興也。於是乎在。敬父今爲宗正府左右司都事。大德丁未。作亭于東昌之墓旁。表曰宗會。翰林學士廣平程公爲之記。太子文學魏郡元君復初。系之以詩。而俾余爲譜。史官袁桷述。

廬陵羅氏世譜序

黃帝二十五宗。距唐堯猶未遠。世系昭穆。混錯若不可考。置而不論者。謂其詳不可聞也。禮莫詳於周。展

親別宗。強本弱枝之慮。品式備具。不數百年。難生於所親。兵車日尋。卒之顛覆。債絕。何也。其所以繼之者。非其道也。禮生於人情。貴貴親親。禮之大經。繇貴而失親。聖如周公。猶不能以制。宗法之不講。所由來舊矣。後漢鄭康成。謂諸侯之別。子爲大宗。自大夫士而下。皆不當有由是常宗之法。廢貴爲王公。其所以承攝者。止於五世。鄭氏之說。誤也。譜牒學廢。姓氏殺雜。獨孔氏子孫。更數千百年。歷歷可紀。而姬氏享國八百餘祀。秦漢之際。已散軼僅存。後王盛衰。抑無以議爲矣。或者謂孔子垂世立訓。貴不以位。故其所傳久遠。然考諸傳記。蠻夷小邦。率一姓數十世。噫。立禮以辨位。位尊而益爭。昔之聖人。夫豈不知其有是哉。消長之理。相尋於無窮。其不可詰者。數存焉耳矣。廬陵羅氏譜。繇唐至今。爲世凡十有五。爲派凡十有八。旁行邪上。如指諸掌。合職方氏小史之記。貴盛累葉者。亦莫能竝。統宗合源。一其所尙。必有其道。參差不齊。物之理也。先之以孝謹。終之以卑讓。黜爵貴德。雖百世可推也。桷也。公侯之子孫。因羅氏之譜牒。將有感。夫昔時之興廢。企焉若不及。而終之以自勉者。亦羅氏譜之微旨也。延祐丙辰八月。史官袁桷序。

### 臨川危氏族譜序

姓氏之學。魏晉以下無稽焉。歐陽子作宰相。世系切切然。將私其親。然卒數世亡軼。是則凡言譜牒者。缺之焉得矣。氏族混於周之東遷。祖以爲氏。猶之可也。別族改氏。因其官簿。以相沿襲。益繁多矣。繇是爲賜姓。爲缺文。一氏而兩望。同源而別派。至於推律觀物。慕風嚮化。雜然而前陳。其避禍者。託焉以自逃。承宗繼絕。漫不可考。竄易傳會。紛然莫能辯者。數千百年皆是也。宗法之不講。所從來久。謂百世不遷者。德如

后稷焉斯可矣。后稷而不能，則凡爲吾徒者，得無懼乎？孟子有言曰：君子之澤，五世而斬，均小人而言之。何邪？昔之親盡，蓋見于孟子，然而私淑之道，充孟子而能爲之者，吾於危氏之譜，其殆庶幾矣。夫遠而不可明者，理之常也。究其初以合乎貴賤貧富，其心博，其旨微，將使夫困者通，盈者持，危氏之盛，循環無窮。於是乎有考焉是矣。維漳州大夫於桷，曾大父樞密，越公同淳熙進士，同乙科，同著作，同爲番陽文敏公之門人。其弟南昌君，族祖正肅公，實銘其墓。桷來京師，族孫有成，嘗曰：兩家疇昔若是，譜非子敘不可。不幸有成卒，其弟歸其骨于臨川，遂不負其言而序之。

熊西玉文集序

粵昔以經賦科進天下士，有司崇尚日異，辟雍居俊游，尤爲準繩，音節程度，更翹迭變，雲翕影附，各以其伎進，拘者輒困躓，不得上方。是時，蜚英溢行，爲時所推重，連百州之地，不能以什一數。邈音聲之近，絕師弟子之敬，和筆繕札，傳誦不止，其好慕實使之然也。當咸淳初，江以東言熊公焉。余師剡源戴公，言爲同舍郎，時學官始授題，熊公據案瞪目，鉤深摘微，落筆澄澈，理融意新，蠶則績而珠纒屬也。未幾失仕東歸，沈冥簡編，空林窮厓之怨，橫溢間發，而安之有命，不憤不怩，猶昔日年壯意盛之所作，擬諸於德，殆其微與。噫，陶唐氏之亡，歷年滋多，精深憂思，愈遠愈在，極周陵遲，諸子相繼有作，是則先王之澤，不可以一日泯，自漢而下，殆無以議。何則？理不勝弊焉。故爾，夫弊不極不足以自振，此強仁者之所宜知。嘗聞公閉門盡心，索六藝之蘊，以極遠紹後之學者，是宜有考，故不知其不能而申其說，命序之者，實壻張拱辰氏也。

陳元吉韻海序

近世儒先以韻書首於江左。其理未竟。論者疑焉。夫聲與韻。文字之自然。童歌巷語。肇於唐虞。旁叶偶傳。與君臣賡歌相表裏。非若今世。拘拘然以清濁爲高下論也。小學廢已久。言六書皆本於許慎。或者謂揚雄太玄奇字。與許氏不合。皆其私臆。殊不知屈氏而下。若司馬諸賦。其不易解辨。豈亦其所自製。故昌黎韓子。謂凡爲文。宜略識字。則世所爲許學者。苟趨省易。實秦相斯之學也。按魏李登始爲聲韻。增益衍廣。實原七均。七均之說。成於江左。江左之文。綺而萎。其於韻若法律爲師。條分目析。錙銖之不可混也。降於隋唐。守其說而莫之變。能變者宋惟吳棫氏。今世所行唐韻。博極羣籍之要。見於其序。而近世附益。終莫能已。噫。學其果有止也邪。眉山陳君元吉。少以春秋試有司第一。南極交廣。以游夫幽冀之平行。搜奇尊聞。包絡擲拾。因韻以廣。卒爲是書。名曰韻海。班然而居。編懸在庭。各得其職。雖第而輕重之。同律呂也。屬辭比事。春秋之教。殆猶其微與。昔顏魯公爲韻海鏡源。集古今韻字。凡三百餘卷。識者謂其摭華撮要。該於理著。四庫散落不具。而今也。卒俟君以成。合流納污。愈遠愈清。至於海者。百川之功聚也。敢誦所聞。而因以序之。

鄆城馬節婦詩序

詩始婦人。先王盛時。天地萬物之理。推變審情者。若是矣。不幸而大故。守中秉德。合於自然。憂辱恐懼。蓋不能以相動也。二南之化。行於天下。未及數百年。陵夷變遷。首於國君夫人。聖人憂之。錄於風雅。書於春

秋後有述作。尤惓惓焉。以致其意。嗟夫。乾坤之道。相濟以成者也。皇元一海宇。累下詔郡縣。孝子節婦。按實旌植。是謹。鄆城王母。其狀曰。馬氏年少喪夫。養姑鞠子。織粟盡恩禮。闔戶循飭。四十年終始不易。由是鄉老言于州。州上其事禮部。繇是得加栢表焉。栢待罪太史。歲終常會。以奏書。然陳詩以觀。史官之職也。凡我同志。什爲詠歌。先之以憂勤。終之以燕樂。足以見夫國家德化之廣。非止爲王氏榮也。豈不美歟。長子質。山東宣慰府掾。季獻。今爲翰林院都事云。

蕭克有字序

在昔先民。理得於簡易。其言動視聽之方。不求合於禮。而所謂禮者何。其日用而不知也。唐虞之際。黎民時雍。至於湯武出而禮益立。於是升降揖讓。以成其容。爲之珩璜。以節其步。武爲之弁冕。以嚴其首服。黼黻有度。尊彝有數。溫柔剛毅。寬嚴張弛之教。復品節而備具之。噫。可謂至矣。世益衰而法益繁。悉刑以防其情。民之日不幸者。非天之所與殊也。俗媮而說厖。教不足以勝。靡然從上。以自治。其亦未知其本始焉者也。周之衰。諸子馳騁。激於世者。黜仁絕禮。以自高。急於近功。則皆苛迫峭刻。益莫知其所措。聖人政刑德禮之論。幾乎其息。書曰。臣人克有常憲。解之者曰。憲猶法也。奉有其常者也。民之初生。淵乎其仁。詩書禮樂。造士之具也。不由是而推。奉法以爲固。有夏后氏之世。吾誠知其不若是也。廬陵蕭御史之子憲。其師黃君字曰克有。請其說於余。詩曰。天生烝民。有物有則。克有之義備矣。假於外以爲常。將失其所謂由己之道。修其由己之道。莫若乎禮。故余先言其得於天者如是。而復以學禮之說告。



袁氏舊書目序

袁氏舊書目者。目袁氏舊書之存于今者也。始曾大父越公舉進士時。貧不能得書。書多手抄強記。至用高祖妣齊國夫人魚魴冠學書。後官中都。凡二十有五年。乃務置書。以償宿昔所志。其世所未有。則從中祕書及故家傳錄以歸。於是書始備矣。于時國家承平。四方無兵革之虞。多用文儒爲牧守。公私閒暇。擊鮮享醴。會寮屬。以校讐刻書爲美績。至於細民。亦皆轉相模倣。以取衣食。而閩之建。蜀之益。其最著者也。紹定辛卯。公自宥府歸里。遂累土爲堂。貯所得書於東西榮。公日處其中。客至不復道世事。顧嗜陳黃詩。擇其適意者。手書爲編。寓物詠歌。與道游遨。休休焉。不知其年之將耄。如是者七年而薨。舊書之傳。距于今四世矣。桷幼聞公從學正獻公時。有手校九經。旁說疑義。皆附書左右。最爲精善。欲從諸父一觀而未得。又欲合諸父之藏。分第爲目錄。亦不果。竊嘗謂天下之物。聚多者終必散。或者早計於未散。則庶幾幸有一存之理。遂悉藏於山中。己丑之災。偕家人渡江以逃。袁氏之書。一夕而盡。昔之預計者。乃幸而獲全。嗚呼。此公之靈。有以啟其衷也。惟公以勤勞起家。其書之傳。不幸而不存。固當歸之於數。其幸而獲存者。敢不襲藏心思而躬踐之。以求無忘前人之意。謹次其本始。書以爲舊書目序。

袁氏新書目序

余少讀書。有五失焉。雅觀而無擇。濫閱而少思。其失也博而寡要。攷古人之言行。意常退縮。不敢望。其失也懦而無立。纂錄史籍之故實。一未終而屢更端。其失也勞而無成。聞人之長。唯恐不及。將疾趨從之。而

輒出其後。其失也欲速而過高。好學爲文。未能蓄其本。經術隱奧。茫乎其無所適從。泛然而無所關決。是又失之甚者也。夫爲學之道。用志不能不一。用力不能不專。農夫菘而廣種。不如狹墾之爲實也。工人泛而雜學。不如一藝之爲精也。往者書未模印時。爭傳寫授讀。較余所藏之書不能十一。而士以三年通一經。其自得之實。皆足以傳世垂後。其視余之書多無成者。豈古人所謂沃土無善民之說與。往年春。書燬于火。偃仰草莽。所失物不復追憶。而於書獨不能忘懷。己乃思前之五失。一旦而悟。將從事於內以求自得之實。其年夏。大人過故都。復購遺闕。篋載以歸。意者斯文之富。將過乎昔。而余又思旁搜遠鍤。俾夫昔日之藏矣。噫。年未至於壯。其五失可以亟改也。而古人之志。余亦竊有慕焉。用識吾過。以爲袁氏新書目序首。

文子方安南行記序

始余讀戴記。帝王疆理。不盡於衡山。而虞書致日。迺南極交州。是則要荒不責其貢賦。使者雖歲往。返亡害也。馬伏波議兵法。與建武帝合。勞民入於潦霧蝟蛇之地。其得意自斂。反不若賈君房建罷擊議。時俗升降。略地定功。後王所尙者。然與唐置安南都護府。獻令鮮薄。同羈縻州。開元詔太史測天下晷。交州爲南履。準事與唐帝類。不聞其有僭拒事也。萌芽侈心。承詔旨以肆誅索。一不得意。而曰損國體者。是誠盜臣也已。世祖文武皇帝。神幾洞察。不加以兵。而安南畏威不敢朝。終五世。削王爵以奉貢。今天子卽位。頒正朔。議遣使。於是文君子方拜禮部郎中。爲使副以行。辭命專達。儀注品節。唯子方是毗。入其境。不旬日。

卒致命以還。稽諸往使。五十年所未有也。還都。示予行記一編。夫誦詩專對。夫子之訓也。予於書獨有取焉。宜上意。傲有衆。誓命焉。有考。山川導別。表土俗以宜于民。莫詳於貢書。至若贊帝德以傳示永久。是非史官不能。子方以論譔奉使事。三者將兼而取之。誠於詩書。殆相表裏矣。蠻荒酋長。俾知夫中國有人焉者。其自子方始。窮極珍麗。媚上以營夫己者。子方不知其說也。是宜廣梓以告于後之使者云。年月日袁桷序。

白季清母夫人受新封詩序

春秋經錫命之制。後王以品秩益展。其追榮倣古則今。至于是大備。今皇帝嗣大曆服。桷時在翰林。得與議典章儀注。僉曰。勳爵古制。以人子所居官。褒崇之。罔俾專美于前代。定其格。入奏。皇帝曰。可。輕外重內。非廣孝道。視所居官。咸大賚之。詔下。皆叩首望闕謝。浙東元帥府都事白君湛。卽以其所宜封者。爲母盧夫人請于朝。得封太原郡太君。盧白皆中原望族。盧以文詞鳴翰林。白氏再世。持雄辨清言。冰雪纒藉。聞者莫不興起。若是者。尤足以振耀也。噫。世之崛然。因其夫與子。蒙爵命者多矣。未有若盧白之清望。足以厭服于當代。恃其世家。白君之所不敢。朝夕溫清。陳白其所行事。秉心以公。張弛興革。孰不曰。是真世家。彼夸詡者。誠不足爲兩家重也。郡之儒士。相率爲歌詩以贊。俾桷首爲序。泰定元年冬十有一月。前史官袁桷書。

甬山集序

文章與時爲高下。誠哉是言也。宋祚將亡。國學考文。其悲哀促急。不能一朝居。四方翕然取則。凌躡上第。至今殘編斷牘。讀之令人歎恨不已。蓋士生斯時。能自拔以表見者。不一二數。有一人焉。則又韜匿沖晦。與世若不相接。始予少時。見三江李君在明于史塾。其貌矍然。其語泊然。僅知其爲長者也。下世十餘年。子汲。以所爲詩文十卷。號甬山集。相示。貫穿籠絡。悉本于五經之微旨。而優柔反覆。羈而不怨。曲而不倨。藹然六義之懿。宮商相宣。各叶其體。情至理盡。守之以嚴。無直致之失。世之號能爲詩文者。率不過是。較一時之輩流。實居其最。惜乎昔時之承接。不足以知其萬一也。維昔秉義公以盛德燾裕。世科聯踵。今五傳矣。論其詞章。則擬於先世。爲有光。汲能廣而傳之。惠於吾鄉。俾其子孫。得以遵守。豈不韙哉。泰定二年冬十月。袁桷序。

蓬萊閣詩序

會稽爲禹會諸侯之所。自嬴政一登。而其山水之勝。迄兩漢孫吳。莫有表章。或者謂當是時。征伐蠻粵。爲用武地。而士大夫在朝廷。簪筆執牘。以奉天子之游宴。顧安得從事於荆榛險絕。以暢其耳目哉。惟太史遷出於流落不偶。以至而見於賦詠。實自東晉始。方王謝諸賢。南徙渡江。北望丘壘。其悲離感愴。不在於仕進。故其意念殊絕。搜奇抉幽。樂天以俟命。而會稽號爲南鎮。將騁懷以摠其所尙。故今之言游山水。實自會稽始。繇是而降。游者益廣。而專牧守之任者。得兼有而畢具矣。元微之以觀察使鎮會稽。所辟幕客。皆知名士。號爲絕倡。後人作爲蓬萊閣。蓋取微之詩語。唐宋鉅作。悉刻于其上。雲內王侯叔能父洩是邦。

政簡訟平。百廢俱飭。復閣之舊。迺曰。昔之諸賢。意必有在。登斯閣也。將見夫同寅之肅和。寮案之靖共。飛觥擊壺。以彷彿之。昔時之盛。巖壑交暎。神閒意消。不苛刻以暇豫。彼俗吏瑣瑣。夫豈知是也哉。同郡儒士合賦詩若干首。桷與叔能同官于朝。審平昔清靜簡易之論。於是乎見。雖老尙能爲侯賦之。泰定三年正月甲子。清容居士四明袁桷序。

### 馬氏族譜序

譜以遠言。懼其非吾祖也。以近言。有悲吾之不得已也。金徙于南。衣冠故族。扶挈僵仆。十失其九者有焉。百不得其一者有焉。難甫定。遺童孤兒。想像先人之容儀音聲。僅得於髣髴。推名諱至於祖。則有能言者矣。上而高曾。不復有能言矣。余嘗攷夫譜牒之書。秦漢以後。牽強附會。世表姓纂。僅取其近似。作史者不得不爾。凡爲子孫者。罔敢以是爲傳信。河陽馬氏。蓋皆昔時之望族。今元帥公知夫高曾以上之不可以譜。遂斷自其可知者。爲之旁行側注。官位名諱。以明其始。卒葬年月。以慎其終。用意弘遠。將以期其子孫之日盛。嗚呼。百年之計。莫先於德。德愈種。則見於後人者。不俟而自至。晉丞相王文獻公。導渡江始立家譜。不及三世。而蕃衍盛大。史不絕書。馬公之意。蓋若是。願相與勉乎哉。則得之矣。泰定二年七月乙卯。前史官袁桷書。

### 鄭原善思親詩編序

廣信鄭君復初。舉進士之歲。時維三月。值其嚴君始生之朝。作爲歌詩。而終之曰。移忠云。自茲其立志。誠

遠且大矣。夫仕莫不欲榮其親。仕貴矣。所尚貴乎自立。不爾則其於貴也乎何有。故昔之學仕者。必求夫大賢者之格言。以佩服之。若鄭君者。策名未離乎都門。超識遠抱。先之以不苟。若是。余嘗於殿廡識之。沖然其容。介然其操。審必能有異乎衆也。暨余還里。咸言其在官也。奇袤不入於市。貴俠不登于庭。盡職而無所顧避。是其所蓄。足以行所願矣。泰定三年秋八月。同校文江浙。始見其屬和者。凡一編。嗟夫。古之果於正誼。必寧夫親。而爲親者。計其詘辱。將與之同患難。而不之避。故載於史傳者不一。鄭君之志。見初筮。數歷既遠。聲譽益振。始信夫家庭之教。在乎夙昔。誠不在夫今日也。因申其旨而爲之辭。丙寅歲八月壬辰。袁桷序。

周彥祥存樂堂詩序

往者淮甸爲南北要衝。耕耨不足以盡其地力。彌望數十里。皆草屋。星散高下。每歲春秋避兵。輒土窖稻麥。老稚潛匿叢薄中。丁男健婦。守舍相偵伺。黃塵翳天。猶能在旁近。結集保護。卒然有相接。持挺箠盡力以抗。其甚不幸者。則皆係累長驅。銜車逐馬。故凡淮民之家。子不識其父。弟不知其兄。因循苟活。慈孝恭敬。施於家庭之懿者。未能也。吁。誠可悲也。夫世祖皇帝一海宇。淮始爲樂土。今四十餘年。昔之父老言昔時之事。未嘗不先之以歎。歔繼之以幸喜。野無閒民。而詩書庠序之教。駸駸乎雍熙之盛。廬江周君彥祥。於是作堂以奉其二親。而名曰存樂。予嘗以爲生乎今之世。有幸不幸存於其間。故其愈後者。則愈樂。而生乎其前者。若彥祥之二親是也。彥祥之奉親。當補其昔時之不可致。推彥祥之年。亂離崎嶇。猶耳接而

身受至其諸孫。則蔑有知之者。噫。豈非愈後者則愈樂。然則彥祥之心。所以樂其父母昆弟者。可勝道哉。太學博士姚君爲之記。善爲歌詩者。將別爲一編。乃首爲之序。彥祥今爲某官。

### 白鶴詩序

泰定元年春二月。有旨醮於崇真萬壽宮。特進宗師吳公主祠事。越四日。有白鶴三。集雲中指殿前。五日復至。旭日晏溫。執事有恪。皆承睫仰視。一日贊慶士大夫各爲歌詩。以侈其異。嘗聞禮儀神明之事。莫嚴於精意。而諸物之畢至。良係乎聖德之通感。惟今天子踐祚之初。詢賢考能。斂福以錫。庶民籲天。請命實不私於己。祠祭之事。遵叙以行。罔有偏好。昔漢宣帝勵精圖治。嚴藏祠事。時則有白鶴集于廟庭。異代同符。稽諸行事。實過於彼。而祝釐奉祀。以承上命者。罔敢暇逸。吳公蓋有之焉。絕地天通。昔之聖人。將以止夫禋祥之說。天人之際。合於自然。蓋有不期然而然者。不然。詩書所稱。其得而廢之與。詩若干首。遂爲之序。

### 春臺詩序

老氏之學。以澹然無欲爲至道。故凡人之所同然者。必激言以相反。至於榮觀燕處。其徒日廣其說。則曰吾教必若是。侈靡盛大。浸淫於天下。其言曰。如登春臺。彼嘗非而鄙之。今考其所爲。若不相似。視其言者。吾猶以爲近古也。延平余君惟熙。於是取以爲齋名焉。昔之盛時。淳厚給足。充然樂其身。非直爲耳目之美觀。日作夕息。相安於閭里。康衢之謠。擊壤之歌。其教易行也。今海宇一轍。戶口田野。休養蕃庶。涵濟聖

澤庶幾時雍之治。惟熙慕古。於是乎得之矣。理適乎中。人情之同。隨物而遷者過也。極枯槁禁制以爲至樂。矯然者也。惟熙嘗爲威茂安撫司僉事。今屬國史府通敏守禮。推命名之雅。其將樂夫天年。同衆以求用於世者。與集賢大學士郭公大書其戶冊。朝之卿士咸爲歌詩。

曹伯明文集序

江西之文曰歐陽王曾。自慶曆以來爲正宗。舉天下師之無異辭。宋金分裂。羣然師眉山公。氣盛意新。於科舉爲尤宜。至乾道淳熙。江西諸賢別爲宗派。竊取國策莊周之詞雜進。語未畢而更事遽起而輟。斷續鉤棘。小者一二言。長者數十言。迎之莫能以窺其涯。而荒唐變幻。虎豹竦而魚龍雜也。嗚呼。三公之文。其思厚以深。其理精以正。凌厲乎諸子。貞元而下。曾勃然不肯自讓。後之人懼蹈襲之譏。卒至於濫觴淪胥。而莫能以救。可勝恨哉。大德中。桷與端明曹公之子伯明甫爲翰林屬。其爲詩文如桑麻穀粟。切於日用。不求酸鹹苦澁。以傷乎味之正。篤實渾厚。與其履踐見於事物者。實相表裏。夫行以爲先。言實次之。言不勝不足以害道。翕翕夸詡。含譏以射人者。猶懼其不解。方手指其說曰。吾意蓋有在。若是而罹于人禍者多矣。伯明以親老再爲編修官。補外以去。幾二十年。來京師爲文若干卷。得而讀之。其哀窮舉躓。略枝葉之學。春容雅馴。以循夫規矩。它不能以詬病也。夫慕其輕浮而欲求似於瑣瑣者。伯明之所不忍。抑有聞焉。老而能學。吾二人之所宜繼。炳燭之勤。願相與切磋焉。



# 清容居士集卷第二十二

序

## 送鄧善之應聘序

近世先達之士類言求進于京師者多羈困不偶。煦煦道途間。麻衣弊冠。柔聲媚色。無以動上意。其言若諄切懇款。後進之士懷疑而不進。百以十數。然遇不遇命也。而言若是。則抱道自足者。益無忌於世。而或者亦得以窺其介。且固焉。夫道成於同。而弊於孤。雲龍之相從。風水之相應。其理然也。往歲余與巴西鄧君道所以。嘗以爲今世無是決矣。吾徒當力學爲己。閉門息心。耕六籍之圃。漑根以茂實。若古逸民高士。退靜自樂。其於道也無害。方是時。君家錢塘。鷺塵五達之衝。意寂而體舒。無造門啣喘之勞。下帷授書。衿佩森立。公卿貴人。皆傾下愛慕。獨君無少矜喜。而去來朋徒。各盡恩意以相周奉。其有不可強。猶謙挹慰藉。人咸以爲其未遇也。已異夫褊心者之論。則其遇當不止若是。今年春。承徵將如京師。告余以行。余固喜夫人之所期者有驗。而其行为也。復將有說焉。君子之出也。大言以行道者。夸誣之流也。相時而行。守身於不辱。謹得避難。貞白而無愧。斯近之矣。方今食太官。衣御府。亡慮數百。擬之漢世爲盛。吾意吾丘周仁之徒。道不相類。若貢禹之經明行絜。區區車馬之對。亦若無可取者。苟不以是進。則其氣昌而愈完。行周而無躓。於得喪益無病矣。夫處順者。逆言莫能入。嗜味者。腊毒無終悔。予與君疇昔相好。無所隱。思處贈

之誼。而密以告焉。

送曹伯明序

議者謂故家世官。陽明精絜之氣。極于簡冊。溢于圭組。盛衰消長。始相尋爲無端焉。嗟夫。豈誠有是理哉。百尋之木。上干雲霄。盤礴慘舒。履之而後至。其風雨雪霜之變。適其事會。理之不可詰者。誰得而辨。而苟一時之得失。以自詭。吾未之信也。士患不自知。而卒病夫知者。迄莫可究。至於凌高躡深。恟怳疾進。幸其安肆顛越。而莫救。則豈其父兄之過。至不幸糜爛墜覆。與世爲始終者。要未得以成敗論也。廬山曹伯明。官翰林十有二年。始爲編修官。議當敘遷。曰。愚名居先。願以讓秩。再滿。則又曰。太夫人春秋高。願補邑以行。吾知其盛衰消長之理。炳于胸中。確乎不能以易者也。維昔從祖文簡公。旣老來朝。翩然東歸。位不充其德。未幾先正端明公。敦知止之誼。慷慨力去。邈乎高風。趾嫩不墜。謙以居之。仁以成之。振世德之緒。使議者之言。不出乎口。其自伯明始。因其行。序以識之。

送范德機序

四方士游京師。則必囊筆楮。飾賦詠。以偵候于王公之門。當不當良不論也。審焉以求售。若乘必駮。食必稻。足趺而腹果。介然莫有所遭。夫爭藝以自進。宜有不擇焉者。心誠知之。孰慙其非。故幸得之。則歸于能。其不得之。則歸于人。惕然而自治。吾未之見也。臨江范德機。游于茲三年矣。語焉簡然。行焉恂然。嗇其善華。韜焉以深。視世之。言文辭位貴重者。靳靳不自表。夫子曰。道不同。不相爲謀。范君誠審焉。抑不可知。使

不可知。則凡辱與游者。責莫能以辭也。君所爲詩文。幽潔而靜深。怨與不怨。皆存乎天。慨然南歸。善治其學。彌謹所徇。使果擇士耶。無以易矣。譬之璞焉。蓄極而光。遇寧有不遂者乎。惜其行解以俟之。

### 送周子敬序

溫與閩地。犬牙相入。俗秀而矜絜。子弟勝衣能文詞。父兄相與言。命束裝負書。以行四方。劇切感動。約有所就不復見。故凡困于有司。則適從諸公貴人。職牋記。劇談論。翺游以自逞。其橫厲捷發者。讀太公孫吳書。囊韉轅門。建功業萬里。樂生重遷。卒無所思。其故土。然視閩俗爲最少。噫。弊成于過高。安其所常。義不能以自勝。恬不知改。積數十年來。蔑有以議亦固矣。當咸淳間。周子敬以治經游錢塘。聲至士避。未幾而科舉絕。來四明。授業于嘗所知己。南望數十驛。每悒悒不自置。罄囊橐以歸。拜其家君焉。得奉終于其家。夫情合於中。情至而不從者。非罪也。縱情而不返。極其所從。於理乎何有。始於榮其親。終於私其身。漠然而不接。茲惑滋甚。視子敬之道。得愧矣。子敬將終老于吾鄉。棄其田廬。畀于季弟。以奉先人之祀。今年夏。季弟疾亟。貧不能以行。天台趙叔度官于溫。載與俱歸。審其心。於季弟友且怡也。桷與之交最深。慕其靜安。絕毫髮僞妄。蒼然長身。風雨一室。無子弟飲助。而清韻雅語。舉觴晏如。與之違。寧無介然者乎。今歸于家。其耄者必曰。當終樂於我此土也。幼者則曰。先生老于行。悉于事。某聞某戒。願執簡以受。去魯之意。吾未知所決也。化民成俗之道。必自上始。因俗以徵其謬。子敬其何遜。敢俟而質諸。

### 送劉習卿序

今之爲守令者。據文法以具事。事弊而法具。雖更百吏焉。無易也。事當而文不具。一撓詰之。辭舌無所對。歲部使者入境。吏曹取舊牘相考訂。附益完善。至名押題署。恣所補不復問。使者坐所治。決事搜撻。十不得一二。然皆毫末靡細。於政體不相涉。故稱能吏者。或以苛察議。噫。徒法不足以致理。任情而失實。故先王爲法以禁其過。久而繁滋。則審於治者簡而易之。使不病焉。斯可矣。大德丁未。浙東西以饑告。殍移日。屬于道。官會其數于鄉。將賑活之。其不實者究焉。鄉登名于縣。縣審而始聞于郡。郡以事至重。闔郡窺以議其一。以故不預。則旬月以俟。乃得達部使者。部發使於鄉。復詢察而周詳。始定其議如令。夫幸民之饑。乘而弊焉者。羣下之過也。因其弊而持久之。則民之死者日益甚。法顧安得以救有司者之意。夫豈不知是拘於文。狃於故。相安而不改其勢然也。今年夏中。書掾汴劉習卿。御史府舉爲浙右肅政從事。習卿精敏簡廉。與余議古今事。嘗欲以無法爲法。其施張而品節之者。必中理道。至於條據辨析。灼與繩墨。脗合向宣江南。灑然無俗吏意。據鞍賦詩。危坐終日。一語不及律令。今從事職掌。號總所部爲至重。故余舉今之所急者以告。俾毋汨於常而變通焉。彼瑣瑣守文者。又烏足與語是。

送祝道士南歸序

世祖皇帝取江南。首詔召龍虎山嗣漢天師掌其教。或曰。其父觀妙公。嘗推天人之要。教由是尊。元貞制書嘗言之。今上卽位。歲以天壽節。命使者祝香于茲山。延祐四年。天冠山道士祝君爲祠官。將行。求予言以餞。噫。盛衰消長。相尋爲無窮。禎祥之說。儒者之所不道。守經執中。則必一其說以立教。然而窮居巖穴。

之士精思據會其爲書也幽明簡深由變察來使之默焉以知畏將以定夫天下之象夫豈荒忽以眩於衆理有所不能逃焉者若是矣老子之學法於簡易陰陽闔闢必本於其身因身以及物故凡水旱疾癘必責其徒其徒則曰吾無爲也何取是若是則其教之廢也久矣昔先正肅公守饒觀妙公始十四五以祭祭上章入靜室正肅公嘗與之論天運環合之道觀妙公愀然有言曰公老不復見當在四十年以後于時族祖永州親聆其說亟言之龍虎由觀妙以興祝君多藝能沈靜篤志其歸山中正辭永命予不能以告敢誦所聞願有以推究則世人之所深望將不憚煩豈若彼大言者飽食自嬉以無聞於後姑勉乎哉

贈宣城汪澤民登第歸里序

今世論道理詞章爲二塗師道德之說者毫分縷析派其近似而刪黜之其言博以約據會統宗謂一足以總萬也然懼其辭工而勝理則必直致近譬山林頽放諺俗之語皆於是乎取甚者金石著述勸其說而師倣之莫得有議焉者矣昔者夫子言行見記於門弟子簡潔精粹嘗並於五經初非有意於辭也謂不若是不足以有傳也性與天道不可得聞私獨怪近世學者參錯輩出過子貢十百倍將惟其所尙而然邪抑羣聖之道存於書涵泳濡嚼不期然而能者歟科舉廢已久今天子崇闡文治損益條制以興其賢能八表之士連軫結袂于然以來然而沿襲之弊相尋於無窮愛憎之說若不相似宣城汪君叔志首上于春官報罷以歸則曰吾學未至焉耳探幽闡微遂益治其業戊午歲復來京師擢乙科授同知平江

州以歸。則又曰。仕優而益學。斯可矣。將行。求余贈言以歸。余固感夫二者之不相同也。綴言以續文。將以明理也。理不自得。剽襲以求之。文益弊而理日益遠。將焉以爲準。與之以化成天下。實自有司始。操繩墨。審程度。有司盡之矣。合八音以成律呂。師曠猶難之。噫。有司之任。其果能有同乎。維昔端明公。誥命擅天下。制作具備。集衆美之效也。慶流雲仍。叔志之踵儒科。于今十世矣。志專而氣昌。異於凡近。其異也。必能以復古。家世趾躅。莫叔志若也。故余以昔之有疑者告之。而因以勉焉。夏四月。越袁桷序。

送吳成季歸省序

噫。吾徒來京師。視成季有三愧焉。居京師者。不宜以塊處。蓬蓬然結鞍整袂。惜日以進。其不能是者。目以爲固野。成季則不然。閉門展書。視日蚤莫。冰凜而川止也。達公貴人。語未脫口。納柔奉佞。千巧百詭。成季獨正色指畫。朗言某事未當。至論天下休養大計。龜灼繩直。聽者喑舌。方疾趨以行。不勝其愧。成季幼爲方外士。常所置論。必曰。吾父母皆耆年矣。惕焉不得以朝夕養。而吾徒將捐棄尊愛。荒塵敗屋。啜蔬飯糲。業官以爲生。如無所容歸。若是者。愧之大者也。今年春。承詔如南。得省其親。樂不能以已。而懷愧者亦爭道而交贊。夫人之情於道不遠。極其所驚。而卒莫之救化之者。不足以導歟。將人事之未思。不復以致此歟。唐之陽城。語若鄙近。薰然而歸養者。凡數十人。何則。機使之然也。儒於道最高。力不勝其弊。則成季之出處。吾當疾馳焉。從而慕之。整轅於四達之衢。斯得矣。又何愧焉。因其行。序以侈之。

送達兼善祠祭山川序

古之爲使者亦難矣哉。存撫省聘。諭言語。協辭令。必盡其誼。嫚有致辱之道焉。情則媿。簡則侮。約而有常。敬以成禮。斯其爲使者之事矣。然此特平世而言之也。飛矢旁午。國懸於三寸之舌。探機以析。明輕重。揣情僞。定議於瞬息。使不亦重乎哉。奉天子命。持節萬里外。懼之而莫屈。而因事專輒。宣威布德。函首入覲。非夫勇智超絕。不足至此。歷千百年。數人而已矣。吾嘗觀夫列國諸臣。禮以定儀。言以敘志。結綬執玉。若合符節。而其諷諭陳白。足以截其驕。泰蔑有敗事。非強辭以言。是其夙昔之所素備。夫子之言曰。專對不能。其警夫四方之使與。皇元一海宇。偏陬遠島。蹙縮候賓館。無事於使者。而歲以祠祭。使望於山川。分道四出。其爲使也。若甚易。至治三年。集賢修撰達君兼善。以使由恆山。濟源。東南上于會稽。吾於兼善有言焉。恆山古真定地也。二河交流。濁漳貫其旁。郡縣築防。歲不得息。或言有運河在焉。民居塾蕩。宜詢其俗。而條紀之。濟源在懷州。懷河南地相接。昔之括地興賦。民不勝其害。河流靡常。空灘遺積。墾殖以自肥者。其誰與。會稽杭相襟帶。粟帛絲布。丹漆綺繡之作。倍於他郡。奇袤夸誕。故都之習。不能以革。獨會稽山水秀朗。民朴安業。往承大饑。荒壟彌望。猶不能盡耕。昔有逸民戴安道。賀知章。其故家曰王謝。能有若斯人者。宜表而出之。悉疏歸以俟。明天子之清問。則得之矣。因其行。故序以告之。

送曾巽堂南歸序

景定中。樞密東陽馬公帥臨安。先子職酒正。入幕府。于時廬陵御史曾公相後先。佩鳴纓。彰剖吏牘。若破竹。俱欲以功業自致。運數合一。兩家子弟東西數千里。過庭入塾。志同業同。而僕適先爲史院屬。會御史

仲子于京師。年富志銳。屢策焉以儆。不能止也。皇慶承徵。入翰林。復會季子焉。氣清貌謙。不爲汲汲計。嘗曰。仕以傳世。岌然以取誚。誠不敢平進以求。而猶曰未宜。吾有不甘焉。今爲應奉文字。論者始斂口。蓋其爲文敏而新。其待人周以和。夫孰曰不宜。春三月。謁告。盡室以歸。求言以處。桷曰。今居顯榮清密者。凜凜不自置名至矣。文不能以稱。文不能以稱。造物之所不畀。於是乎有覆絕之憂焉。憐然以興。萎然隨之。是則得者失之兆。君何憾焉。桷官翰林。踰二十年。老不戒止。念之至者。滋以懼。將歸故山。究五經之蘊。爲書以勸遠。文詞之任。老不能以進。炳燭之勤。願相與勉焉。泰定元年三月。四明袁桷序。

贈崔兵部序

高句麗崔君耐卿。往督征稅於京城。不私其餘。以進于官。旣又懼爲後來者之莫繼也。則慊然曰。吾豈爲奉上之罪人哉。復疏以告于上。曰。事適然。願勿以爲程數。噫。崔君仁矣哉。今世善言利者。督括虛籍峻鞭。朴以求媚。嘗認認以告。吾所居官。能贏餘以自效。當升夫資秩。相率以效。腹削日廣。而其徒爭不肯自置。其猥闖者。則攘臂以取。不顧利害。其弊有不可勝言者。今崔君兩得之。不希于公。不病于民。絜矩之道。至而儆夫在位者。皆得以同是道也。崔君往爲內史府官。見天子于王邸。大器異之。今卽位。首拜兵部員外郎。兵曹之事。多於昔。飛符調發。水陸之需。頃刻在立辦。寬則事不能以濟。稍苛急。民之病有甚於專征之弊。崔君推昔日之心。明以核之。仁以恕之。政績之著。有踰於昔。將步武日躋。廣經濟之志。不愆於素守。桷也。願拭目以觀。因志其美以俟焉。泰定元年三月癸卯。四明袁桷序。



送王叔能守會稽序

桡與北京王叔能交。幾二十年。其贊行省於浙江也。盡心而不苛。合上下之情。婉而加且詳焉。弗亟以邀美。弗固以逞志。執政宜之。寮案服之。至治元年。丞相慎選左司之熟於政體者。叔能在選。爲都事。英宗皇帝更庶政。除前相所行不便事。下詔天下。命御史臺樞密翰林集賢集議。桡時得預末席。叔能首言。江南兩稅已定。復增買區銀賦。賈無常居。賦重卽逋逃。今徵額籍具。使無能輸。將併於主戶。主戶旣主徭役。是徭役之外。別有銀賦。將不勝其害。羣公以爲然。新詔旣下。取首建議爲多。古之善言利者。莫先於劉晏。晏所行不至急刻。而晏迄不善後。是興利爲害身本也。躁於求進。卒之自唐以來。如晏者。皆無以自保。吁。可不懼哉。叔能世居燕北。而樂於江南。於江南厭其囂煩。而樂於山水。屢丐補於外。宰輔察其志。奏守會稽。會稽王謝之所居。泉石清美。有不可勝道。逸少安石。經世素蘊。託丘壑以自負。蓋深取而有擬也。昔之陳迹。按行而搜撫之。舉觴以酌。其訪於民俗也。不察其毛疵。事至而應。無欲以自化。將見獄空訟息。少者避於道。老者游於衢。擊壤以歌。沐太平之治。郡守之賢。必以王公爲第一矣。因其行。序以祝之。

贈孟久夫南臺掾序

世嘗病夫儒與吏。其道不同。卒莫有一其說者。爲吏者曰。法定於後王。微忽不可以相混也。徵調出入。官簿淺深。不可以踰越也。童而師之。猶不能以盡。今儒者之說。急於所緩。高而迂。滯而疎。卒一遇焉。吾深知其莫能成事矣。儒者則曰。法有不忍人之意焉。審官別人。制用有常。沾沾然迎好以刻意。非爲治之本也。

然而爲儒者莫有以見於用。間嘗用之。其肯繁節脈融貫昭哲之理。疑有所滯。而益得以藉口。吁。是誠難矣。今天子崇尚儒術。立進士科。昔之舉茂才者。咸試吏以盡其材智。憲府舉按守令。閭閻纖粟。令式高下。日接于耳目。果勤而敏修。若視鑑焉。瞭其妍醜。無有逃遁。於是儒吏之一。傲自今始。吏部從事孟君久夫。以茂才舉者也。兩屬於司憲。復辟御史府。矜抑自將。盡其廉隅。入吏部。朝夕謹曹事。人莫有識其面。遇事守令甲。不踰越。旁暢曲就。藹然猶守儒素。吾知足以有用於世矣。未幾。江南御史臺復辟爲掾。將行。袁桷告之曰。御史臺職諸道黜陟。歲終會事。以廉直舉者。不能得一二。人黜者何多。陟者恆寡。激獎之道。豈上有所未備邪。守法而不變。視其成牘。惻然以求仁。善人之用心。非墮法以爲直也。州縣賢否。孟君嘗知之矣。執中以權。使無偏焉。亦儒者之說也。故重之以言。

崔君都事餞行詩序

今之言贊畫者。以撫拾爲能。羣吏抱成牘。入幕府。一不可意。輒曠日相持不決。由是揣摩迎合。弊有不勝言者矣。昔人之善吏治。事決於頃刻。理定於造次。安于其自然。人莫能有以爲非者。心出乎公也。海右帥府事。號最簡。其治於民者。七郡之守令係焉。寓於軍旅總戎。夫長之職任焉。今而曰某事所行。吾將諭之以從我。又曰。吾不能坐視其利病。更謁迭請。由是有撓政侵官之譏。雖不面議。退而悉數其長短者。皆是也。夫其職在於奉行。先之以更張。上所增疑。而下益得以議。是殆昧於守官之道矣。大名崔君義甫之爲都事也。未明攬衣坐署。執筆無滯礙。其不便者。白於長官。從大府以行。一介之卒。不入於所隸。敦厚侃侃。

守正以自律其給之者謝不與較。養恬藏智。閭巷之人不知崔君之贊帥府。三歲解去。而其不知者始曰。詎不知崔君無囑託於州縣。吾是以不知。今而曰知。殆惜其去。而願後來者之與崔君同也。噫。功利增羨。人所願學。每率得奇禍。而猶接踵不悟。視崔君所爲。其果有悔乎。郡之文士相率爲歌詩以餞。桷遂爲之序。

贈陳太初序

戰國之士以雄辨長說游諸侯。立致卿相。故其高自譽道。無所顧藉。雖困躓有不肯悔。揣摩相師。遺言成編。今七十二子之書。皆足以爲游之具也。漢世尊尙黃老。游士屏息。武帝開絕域於萬里外。游者復至。盡其足之所歷。圖寫險阨。立功效能。以其荒怪異物。輸于地圖。而口舌之學。悉廢。與戰國之游有異矣。南北分裂。游不越其國。游之效不能以著。唐立科舉。各挾策自奮。窮山水之勝。履危陟幽。則皆其羈窮不遇之所爲。見於詠歌。蓋不以爲利達富貴也。若是則游之道幾廢矣。宋承唐舊。巖居逸士。見於聘徵。游者益恥。至於季年。下第不偶者。輒爲篇章。以謁藩府。京淮閩廣。旁午道路。數十年不歸。子弟不識其面目。囊金輦粟。求筮庫之職。以自活。視前之游。戛戛然難相並矣。世祖皇帝大一海宇。招徠四方。俾盡計畫。以自效。雖誕謬無所罪。游復廣於昔。敝裘破履。袖其囊封。卒空言無當。以其無所罪也。合類以進。省暑禁闔。駢肩攀緣。卒無所成就。余嘗入禮部。預考其長短。十不得一。將遏其游以喻之。游者訖不悟。朝廷固未嘗拔一人以勸。使果拔一人。將傾南北之士。老於游而不止也。今游之最夥者。莫如江西。其拙游者。惟浙東。浙之東。

天台以能游稱。四明之士不著於游錄。餘五郡間一見之。括蒼陳太初。壯歲能詞章。得濟勝之理。西適錢塘。復來四明。以其藝游。公卿多深獎之。業儒以爲本。復挾能以自張。其寧有不遇者。故余歷言游者之幸。不幸。太初之游。夫豈若是然哉。生之高祖容州府君。與先樞密越公同爲淳熙進士。於其行。得盡其言。且命二子爲歌詩以餞。

送俞教授回里序

吾郡教官。由至元丙子以來。見於題名者。亡慮數十人。皆得而接識之。其通於綜核者。善移易故籍。結熟郡守。鉗士口。不得發。歲時表章。經說疑義。卒假者。舊以陰助。誦聲寥寥。講授不立。不復以師道自任。由是諸生之亡賴者。挾短長。以剽竊廩稍。而貴駸之子弟。恃其可侮。益得以恣睢。有終歲不入于學宮。極於弊壞。而勸學之詔屢下。爲虛文矣。始余以爲吾郡惟然後。官京師。見教官選于吏部。凡數百人。罷老不勝任。十居其六。若吾郡之弊。十有三。其俊秀博習。則皆爲館閣掄選。各得以自見。而所謂若人者。十僅居其一焉。噫。考昔時得人。必在教官。今不如昔。或者謂入仕之門。必慎其始。故今之爲教官。不三考已致其事。尙何能冀其惠淑之益哉。合吾郡之教官。得一人焉。曰。天台吳君宗彥。吳以牋記游公卿。其文辭亦關絡合時用。去三十餘年。復得一人焉。曰。永嘉俞君希魯。用中父。其屬筆纏麗。若錦機然。五采彰而文密也。其行溫然。其容粹然。聽其言。若飲醇酎而愈恭也。論理而不泛。取友而不雜。余交於俞不君一年。而知其所爲。若是。惜吾郡之後進。習於故常。不能以請業於其行。序以餞之。爲歌詩。凡若干。併見于後。

送陳山長序

郡博士而下。其尊且專者。莫若書院。數十年來。朱文公之說行。祠宇徧東南。各以四書爲標準。毫杪擿抉。於其所不必疑者而疑之。口誦心臆。孩提之童。皆大言以欺世。故其用功少而取效近。禮樂刑政之本。興衰治亂之迹。茫不能以知。纍纍冠綬。礙於銓部。老死下僚。卒莫能以自見。良有以也。蘭亭有書院。自東平王侯始。右軍之學。非止於一藝也。經綸憂世。寧不仕焉。以見其志。審勢陳害。瞭然指掌。非善於謀國者不能也。語必堯舜。高自譽道。卒至變易紛擾。而莫可救視。右軍之行事。誠何如哉。參政清敏。陳公之曾孫。鑑翁。爲長于蘭亭。求余以言家世之正學。不能以告。憫夫世之通弊。知長于彼者。考右軍之傳。做其所言。陳白于太守。太守王侯通達國體。求儒以自近。君有言。其寧有不遭乎。

送蔡府尹歸里序

郡守之任亦重矣。視其精神。爲之折衝鈎抉。一不加意。吏挾以侮。民逞以姦。故其食息。嘗內省外顧。非習與力兩全者不能也。朝廷察爲仕者之有病於吾民也。於是著致事令。而其罷軟昏眊。不待年而具者。朝廷亦不能以限之也。余官京師。見有請于廟堂。自陳其剛強矍鑠。雖不之許。察其意。猶有缺望。噫。羞惡是非。人皆有之。若是果何如哉。濟寧蔡侯茂先之守於四明也。屢引年以請于上。考其年。猶未至也。旣而曰。吾宜休而不得謝。可若何。遂移疾家居。踰三月。始告于其同官。及嘗所往來。曰。吾具舟江澣。將行矣。於是咸驚。且誦曰。蔡侯之來。民實不知。戢其奇袞。返于雍熙。不苛不黷。歲則大熟。侯復于所。再命作牧。自余歸。

里中數聆其議論。明而通。相時以行。無矯激之過焉。保其身若是。人孰得以議。審侯之進退。將以爲不知止之勸。聞于天朝。其寧使夫終老於里閭。則其去也。蓋抑將以有進也。文學之士。是宜爲歌詩以餞。遂首爲辭。泰定二年九月丙寅。郡人前史官袁桷序。

送閔思齊調閩府序

閩郡縣蓄產饒給。仕於彼者。咸曰可善更。蓋其疆理與京師相遠。浙爲要衝。貢賦考工之役。使者督責亡虛月。而閩獨以絺繡爲勞。視若重任。較二浙爲十一耳。閩浙二帥府。府史更迭受任。然終以閩地烟瘴蒙犯。少優其歲月。隴西閔君思齊。由浙東更於閩。則曰不然。九州分設。唐虞之制也。今皇元以仁武函諸夏。卉裳重譯。罔不臣服。幅員倍古。限南北取士。非上意也。立賢無方。是則世祖之明訓。而凡吾徒之居於南者。稍得致通顯。輒言財用掇奇禍。或言刑法致深文。根株排連。牢不可破。守正脩己。悉不復自達矣。桷曰。珠玉蘊于山淵。採擇者必之。夫絕域。是寧有遠邇耶。世祖皇帝遣使徵聘。必先夫江南。歲月旣遠。聞者益荒。見者益狹。彼區區售技自獻者。實不與昔時並。思齊敏不自夸。百受而不撓。精於琴。知急焉。不足以知操縵。將緩以求深。懼其爲辱。緩也。考其中聲。按抑止泊。澹兮若無營。激兮若有感。是則於政事文學。法理於此盡矣。蔑有加矣。桷老矣。遲君之還。猶能鼓南風之弦。歌明月之篇。其果有合乎。泰定三年秋七月。清容居士袁桷序。

送薛景詢教授常熟序

泰定元年。吾里進士上南宮。曰。薛君景詢。程君時叔。史君車父。三人者。皆故宦家。所居皆在城東。志同道。同聲聞同意。其歷階以陞。比肩而袂接也。未幾。獨景詢下第。于時。余編試殿廡。景詢不以咎。而余獨恨。景詢之不果。遭也。天子新卽位。推龍飛恩。授常熟教授。以歸。將之官。求言以導其行。抑嘗考隋唐選舉之法。不久卽弊。今夫所謂經疑者。以知行體用而鈐約之。不中不遠。經說萃于一家。按其形模而脫擊焉。不敢以自異也。有司守固陋而程式之。千士一律。欲求其總核同異。會衆美以合乎至論。不可得矣。賦貴於鋪揚。因雕蟲之譏。而以理致爲長。屈宋兩漢之作。誠不若是之易也。至於考晁董之對。則方諸近作。有不待辨而明者。自設科取士。桷未嘗不預議焉。嚴以取之。則近於隘。俛以售之。則鄰於率。心慙焉。以不釋。薛君較藝於京師。誠知其有幸不幸。操車於四達之衢。險阻曲直。惟御是審。則淑於是州者。必有其道。吾將見褒然秀出者。推是州爲首。是則薛君之教也。





# 清容居士集卷第二十四

序

李慶御史餞行序

昔之公卿貴人居處要地。言語出口。足爲世重輕也。故希進之士。聯袂接履。望塵伺色。日若有所不足者。其勢然也。登用更迭。一旦謝去。則引結儔類。議其短長。甚者旁及其子弟姻黨。得者未報。其不得者常忿誹。若是則毀譽之說。固不足以爲誠然矣。大德癸卯。桷以太史屬事。承旨閻先生於翰林。先生色莊。慎許可待。院屬必面質其長質之。而猶以爲疑也。卒詢於嘗往還。以考其詞學焉。桷入院五日。先生召堂上曰。子能爲制誥乎。桷謝不敏。頃之。出片紙。令試制草。卽具稟以進。閱一月。將登車。輒命譔廟學詔。如漢詔令體。冬十月。大會院屬。令擬進五朝實錄表。桷得預擬焉。先生始察而獎之。卽署爲應奉文字。間以事詣門下。甥壻卻立。奉唯諾。不敢仰視。庭肅然也。夫爭名者羣進。速化之道。莫易於自獻。爲之上者。審焉而彌詳。則其怨謗也實多。久而議定。必視其取士當不當。固可考也。先生壻隴西李慶長。館于公有年矣。朝舉優老之制。爲高唐州同知。以便侍養。先生下世。議者之口始曰。先生已矣。繼之者其果有能近之者歟。慶長之仕。不急於進。方墾田樹桑。以裕其衣食。翰林追思先生之德。舉以爲佐。未幾臺徵爲西臺御史。桷始曰。先生去國與歿。幾一紀。翰林追思其壻焉。誠不亡矣。臺糺天下士之清濁。銖考而始用之。慶長之平昔可見。

矣。始爲得人賀，而終以見夫先生之行事焉。則桷也亦竊有榮也已矣。歌詩以光其行者，皆朝紳。桷以舊好，不讓而爲之序。

平章政事王公歸省魯公餞行詩序

延祐六年，平章政事王公居中書三年矣。每奏事，輒請于上曰：「臣疲懦不稱，臣父年過八袞，陛下赦其愚，俾遂終養，臣不任大願，請踰四五不允。後有詔曰：『宜官其子本郡，以侍祖父。』公卒謝不敢。冬十月，皇太子受玉冊，詔示中外，始以其子某傳詔歸東平。因省魯公焉。魯公往歲嘗對詔使具奏曰：『臣齒髮未脫，落願以弱息盡力事陛下。公之雍容廟堂，魯公之志也。然公歲數請不置，十有二月辛未始出允旨。公拜手稽首望闕謝，翊日蓐食策馬遂行。公卿大夫設祖席門外，至則無及矣。迺遣使者傳旨，以內醞精幣錫魯公。猗歟盛哉！桷嘗聞之，君臣際會終始之道難矣。昔之大臣一斥而不復者，往往見於傳記。今公之在位也，精白自持，卑讓若不足，超然遠去，詎捨國以自全也。粵若稽古明王，求忠臣於孝子之門，吾知公之在家也。閭里往還，益知夫守令之賢否，其不便於民者，熟詢而究論之。四方之使，乘傳入驛，將脩容門下，水旱盜賊之原，財穀徵役之害，虛心以求，筆于簡牘。歲時附奏，益以彰畎畝不忘之忠，而魯公方精彊遨嬉，充然孺子之色，或徹于上，聽出處之道，是皆不能有以豫計也。維今聖天子孝治隆古昔，一時廷臣生榮其親，不一二數，鋪揚詠歌，詞林之職也。遂各爲歌詩，庸敢不讓而首序焉。」

瑞芝亭賦詠序

昔之聖人。建中和之本。畜四靈以爲應焉。麟鳳則其儀。龜龍效其文。脩火之利。以制五穀。養其太初。壹情性以齊形色。四方不同。而養生送死。莫敢有異焉者。教使之然也。中古而降。道德不能以一。而昔之所睹。悉以爲異。表章鋪模。圖記所載。不常有於動植。遂名之曰瑞焉。繇是眩幽扶奇之士。棄所服飲。吸空制景。烹冶飛伏。卒枯槁無所成就。甚者則曰。吾治法有未盡。吁。可哀也矣。延祐五年。中和夏真人明。適承詔祝祠上清宮。精一不懈。竣事。憩館于崇真院。松竹交列。觀厥墳壤。擢莖而光。玉質鏐章。瑩然以敷。咸曰。是芝也。誠爲瑞。稽圖徵史。復曰。無以異。遂積竹爲亭。以落之。迺曰。繫吾道祖之應焉耳矣。鏗鏘春容。攄藻獻秀。筆爭綴而簡爭續也。余讀而歎曰。頌聲之變。基於魯。登高能賦。始之以洋溢。終之以託寓。其理然也。神農書定芝爲上品。神仙家服之。云可得上壽。蜿蜒清淑之氣。嘗闕而不發。地非愛其寶。待其人而始彰也。維今開府大宗師張公。際休明之運。陟降帝所。幾五十年。子孫繼承。罔敢暇豫。是芝之瑞。吾見耄期稱道。益莊而愈完。表于山中。夫豈榮觀之美。挹其粹和。道充氣腴。異日駕青牛之車。歸返故山。撫芝一笑。則其爲瑞也畢矣。願敘以爲徵。

### 壽樂堂詩序

延祐乙卯季夏。檣乘驛留杭間。則與友人泛舟一游葛嶺諸山。穿幽入窮。嘉木叢柳。鬱然上下而相望也。遂遵其蹊。以升其坡。陋有堂踞址。轟完而不華。冊其顏曰壽樂。羣峯蜿蜒。水光相屬。前挹左舞。顧登其堂而異之。客曰。此容齋李公習靜之所。非所謂臺榭苑囿之觀也。且昔之翬翼而侈者。於公乎何取。世有專

鍾鼎之貴。其得意盛時。未嘗不寓興於山林泉石之清美。疲精竭資。仿象其舊游。卒不知其所造。今斯堂也不專乎構築。不勞乎藝植。心領於物外。其得乎湖山者。是幾有道之士也。于時李公領元帥之符于海右。桷復以間歸里。因得贊茲堂之勝。公笑且言曰。土木之夸。吾深鄙之。洛陽名園多矣。擅名專美於後世。今何人哉。夫動靜交養。迺成其性。錢唐諸山水。渟泄起伏。大者爲盛衰。小者爲榮辱。有得乎是。則視茲堂之樸簡。其旨深矣。至人之心。如珠在淵。樂之至者。終身而不厭。取諸在外。非有損於內也。願與爾邦之士。率爲歌詩。而子序之。退不得讓。遂以昔之聞見者。次而爲之序。

送彭道士侍親詩序

范文正公守番。更定學宮。咸言嗣是番爲衣冠聚。未幾彭尙書舉進士第一。正直朝著。爲吳楚間領袖。其第忠毅公。不幸城守身死。二忠易名。見於宋史。作史者深有感焉。嘉定初。先正獻公越公俱在著作庭。深言朱墨史避忌。而宣政實錄於魯諱。時宰尼之。後六十餘年。皇元大一統。宋故家子孫。變滅澌盡。獨忠毅公裔孫南陽。作而曰。吾宜游於方外矣。其道祖位秩視三公。於視聽也尊且榮。起處也不貸假。以自貶。嗣師吳公。方藻思魂識。將樂其同而進之。況於親者乎。未踰年。則曰。詎宜久京師居。母氏春秋高。歸以奉。則庶幾幸不墜矣。將行。且丐敍其情。桷於是深有愧焉。忠孝秉彝。皇極之訓。中古肇分。重華是著。更秦暴強。而死節謹書。踰千百年。迄不能一二數。獨於彭氏見之。歌詩者寧得以辭也。

送文子方使安南序

安南繇秦漢以來。內郡縣。世祖神武皇帝取宋荆揚益三州之全土。大一統。東踞高句麗。西度流沙金山。王業之基。不知紀極。坐朝按圖。指銖黍地。曰。茲南交州乎。得不爲武。寧能以中國民甘心而係頸之。遂俾成要荒之禮。以歸蠻夷多疑。其子常稱病不至。禮謹會同。尤嚴於錫命。故其自署表曰。世子臣某。其所以容受而畏懼者。實在是。新天子卽位。更元曰。至治。遣使詔諭。故事。必遣近臣爲之。又擇能文辭通達國體者。以貳之。於是僉曰。翰林修撰文君子方有使才。實可任。迺名上于天子而許之。遂增秩爲禮部郎中。以行。將行。其友袁桷曰。往使者鄱陽李侍郎思衍。薊丘李侍郎衍。天台陳郎中孚。河間李侍郎京。皆得與交。交人言鄱陽清介質直不絕口。聞其俗善儉巧。館餼供帳。故不如法。俟詰讓始成禮。入其境也。必迂途清野。或謝以病。緩歲月始迎。春氣萌達。黃霧苦雨。然後拜使者而送焉。其狙詐率類此。而不知者常逞夸肆豪。以受多言之羞。昔讀左氏傳。見列國諸臣。取詩斷章以成好焉。簡而易而且和。信由於衷。而禮以辨之也。故夫子之言曰。雖多亦奚以爲。列國之臣得之矣。況於朝廷乎。又嘗聞李公言。使者入境。詰其館人。一草木名字之微。必聞於世子。翌日。涉筆始具。對蠻陬遠人。設施周密。若是無它焉。懼削其土也。交州之土產道里見地記。而昔之入貢者。又皆淺薄不足取。於其不知者。寧缺如也。子方以余言爲然乎。若夫周折之宜。守經以揚文德。則必曰。天子仁聖。明達萬里外。子方優言之。是則余無以告矣。

### 送程士安官南康序

朝廷清望官曰翰林。曰國子監。職誥令。授經籍。必遴選焉。始命獨東平之士。什居六七。或曰。洙泗先聖之

遺澤也。誠宜然。又曰。其浸汪洋。淳伏。昔東諸侯闡興文儒。飛矢交集。弦歌之聲。不輟於蠻序。有自來矣。桷向爲翰林屬。所與交。多東平。他郡僅二三焉。若南士。則猶夫稊米矣。士樂得所依。連彙以進。各以其所向。上有以挽之。下有以承之。勢使之然也。程君士安。則不然。程君。魯士也。獨游夫江之南。幾四十年。詢其先友。則皆在上位者。不獲於上。豈程君之藝。有未至焉者。與。嘗得其詩詞讀之。視其同郡之仕於朝者。亦殆相似。其大過人者。誠顯矣。而視與程君同者。則誠枉而不逢者焉。少仕於南。御史臺。後爲吾里元帥府掾。強貴者。蟻之。卒得白。而程君亦年以浸老。今年調南康。理曹以還。嗟夫。類聚以方。士患不得之。既得之。則不宜以遺佚。隨聲媚容。置之良是矣。才焉而不遇。則在上者。寧得以辭其責焉。因其行。敍以慰之。夫子曰。不怨天。不尤人。則亦曰。有命焉耳矣。咸爲詩章。凡若干首。

送陳景仁調官雲南序

至治元年。中書省選集賢都事陳君景仁。調雲南官簿。將行。謂袁桷曰。吾與子交久。子寧無一言以贈乎。於是有言曰。在昔世祖皇帝。寧一海宇。幅員袤廣。凡爲仕者。力不能以自達于京師。故歲必遣朝廷望官。卽其地。如選部注授焉。省之遠者。曰湖廣。曰江西。福建。曰雲南。其最遠。莫如雲南。故自三品而下。皆得除擬。奏而後出命。視他省爲最重。其受任使者。非清慎明正。不足以當之。維世祖。繇壬子入吐蕃。破蒙段二姓。宋金所不能臣。至是。踰三百年。始定。神武偉著。時則有若養公。稱合上意。羈縻而綏撫者。厥有攸治。夫以蠻獠之俗。俾安其素習。誠不在於煩促苛削也。因其民風。而俾之爲官者。長子孫。不越於其境。則安而

簡易矣。邊隙之生所從來久。出於長民之貪黷。殿最莫嚴於考課。循歲月以善解。視其成績。則調是官者。雖離婁之明。將何以辨之哉。厥今御史循行郡縣。察探是否。而坐驛頃刻。促具食上馬。懼夫事之填委。將終歲不能以盡也。今之爲遷調者。居于是邦。雍容詠歌。得覽其山川。詢其阨塞。仕焉而已者。入閭以問之。其隱而在下者。詳延以博詢之。則仕於彼之士。吾將瞭焉胸臆。而示諸掌矣。不然。拾級循敝。朱墨之職。一介吏足以辦。何假於陳君乎。陳君清不近名。慎而有守。明足以養其厚正。無失於過舉。若是則足當其選矣。余將奚言焉。是宜率爲歌詩以迓其歸。

### 送李漑之致祠山川序

病矣。夫幅員嘗不能以合也。五方之俗。惟不能以合。故地氣各乖於一偏。昔之赫然以統率之者。嚴於方嶽。望瀆海之爲。帝所由來久矣。必皆致祀焉。夫山澤通氣。騰降蟠際。卒之以立民食。豈以它故哉。在昔盛時。惟漢唐近古。能徧至而遵行之。然而巫祝之祕。或鄰於方士。其餘偏方分裂。帝號尊襲。車輪馬跡。南北不相踵接。僑立望祭。神弗顧格。責之以一風俗。成時雍者。亦難矣。世祖皇帝以仁武英叡。成大一統。考先代祀典。曰茲職。方氏登載。實萬姓重事。遂歲遣從臣。捧香幣。各分道四出。郡縣祇恪。候驛謹絜。視他使者。爲有加。粵昔唐虞黜陟。成於四岳。昔之善使者。不專於所命。水旱疾痛。承制以便利之。今守職如守法。非儒者不足以語。而生事者不保惜。復將有以病焉。抑難矣。至治二年。集賢都事李君漑之。承詔首北嶽。遵濟源。轉北海。終會稽焉。以登其於行也。將見夫挈瓢囊以就食者焉。又將見夫餐餼之不給於適館者焉。

踰於大江東南之民。外侈內枵。罷於不作不役。而歌臺暖榭。心目飛蕩。以貽無窮之害。若是者不能以悉言矣。既之明國體。所歷彫瘵。願悉疏以白于執政。若夫悲愉駭慕。深林危徑。矢於言辭。而使夫人傳誦者。於其歸也。桷雖還里。尙能敍而廣之。

郭子昭淮東廉司經歷餞行詩序

淮南地廣袤。昔號用武。故其勁悍伉率。遇事嫌曲。輒私剖決以直。不復上官府。水有菱芡魚蟹之富。平陸則免鹿馳逐。飛鳧鳴雁。蔭翳陂澤。網獵足食。不丐假於外。事簡而易治。夫以易治而強治。則變易不安。曹相之治天下。豈不用其心哉。則亦曰煩擾非所先也。余嘗過淮南。道繇肅政府。日未午。官吏上馬去。故視他道爲最優。汝寧郭子昭。今爲其幕長焉。子昭之吏事。不拘文以求苛者也。若灑渠於川。順其自然。激射穿齧。不能以逆水之性。學優而辭工。將考其山川。詢其廢興。抉搜幽奇。悉出於翰墨。廣陵有儒丈人曰王令逢。原文甚古。臨川王荆公敬企之。願求其書以廣。方今四海乂平。將化其斷斷。褰衣長襜。使與計吏偕。是則子昭之教。在所急也。爲歌詩者。俾余首爲敍。

王正臣浙東廉司經歷餞行詩序

朝廷置廉訪司總司。曰監司。曰使。其屬有三。每歲循行不與。止受其成牘。議輕重。職簡且尊。視聽黜陟。專於一郡。而所部他郡不復考。故其毀譽常若不及。或者病焉。權莫重於循行。今之言者曰。歲五六月。錄囚。秋七八月。出司。明年春還司。所歷有程限。疲精於某所。則足跡不能盡。於是有料簡之法焉。民懷其冤。卒



無以自白。相率以告於總治。疑矜其情而許之矣。議者則曰。是在於行部。侵越則事繁。事繁則竅窾不相協。安於平素。守官以自全者。爲善計矣。夫行部之寄。爲最重。泛常以治之。民不勝其病。告于其上。卒拒之以辭。使一振舉之。則歲之分治。將悉心以究。是它郡之事。悉總於我。謂專於一郡者。非知言者也。聊城王正臣。以內臺掾出。爲浙東幕長。通達治體。守儒善斷。今監司馬公。嘗鎮江西諸郡。皆嚴憚之。是能知總制之道。輔之以正臣。事可立具。浙東民俗簡易。春溫冬嚴。相濟以須。吾知其足以振采於一道。於其行。序以告之。且率能歌詩者以餞焉。

送朱君美序

許文正公定學制。悉取資朱文公。至仁宗皇帝集羣儒。定貢舉法。五經皆本建安。書蔡氏爲文公門人。而春秋傳則正字胡公之從父文定公。師友授受。宗于一門。會于一郡。至若訓蒙士。正史統。度積筆錄。悉師于文公。何其盛也。夷考地圖。閩粵繇秦漢始通。今九州之地。非不廣。而道德師表。不敢有異於文公者。繇文正公獨建大議。而聖天子有以成之也。今之爲議者。則曰。南士淺薄。不足取。又曰。其文學論議。與中原大異。夫行事必本於經。考成均之法。惟文公是師。而南士獨有背何耶。余嘗入議者之室。其服食器用。由南以來者。頗若愜所好。其無乃貴物而賤士與。識患於不弘。黨患於過偏。自昔創業之君。合一海宇。必取遐陬荒域之士。以自近輔。維昔世祖皇帝能知之。選取蓋可稽也。文公五世孫煒君美。以宸旨入國學。議者亦若不滿。然以其所受學。皆文公也。視其子孫少假之。今以書考之法出仕。將行。求余以言。念昔先正

獻公與文公俱以僞學坐禁錮。政治更新。善類彙進。文公書大行於東南。今六合一家。文公之學。行於天下矣。士能通其學者。其寧有固執之弊。桷官京師。踰二十年。見昔時諸老津津於南士者甚衆。考其異同。其亦南士之不如昔耶。其亦異者之不如於羣公邪。君美以世濟令德。將見於涖民。輕術政事。余不能以告。故歷南北好惡。而知吾文公之道千萬世。南北不能以易也。

送陳道士歸龍虎山序

往歲見福唐張君見獨于京師。貌清氣完。語簡而意消。察其退靜。泊然無求者也。山中之人曰張君。居室靚邃。滋蘭藝松。藏善本書盈庋。督教其弟子。恂恂卑讓。見之者必知爲其徒也。至治元年。嗣天師入覲。君死且十年。侍劍印者曰陳某。桷初一見之。甚似吾張君也。問之。則曰亦福唐人也。閩爲儒林。經典釋文。陸公德明所校定。天下遵守莫敢異。夫閩昔爲荒陬。言語不合於中土。六經表章。旁及諸子。繇唐世始定。而獨取於閩何邪。九州之士。未始以南北限。陸公書積六七百年而不廢。則其疑息而無可議者矣。今則曰揚以南爲蠻夷。吾不知其何所自也。其亦有所激也歟。余將有言焉而未之能也。嘗聞龍虎山。尊崇吾聖人書。絃誦之聲。接於兩廡。往銘空山雷君。其於書若飢之於五穀。朝暮不敢棄。故其門人樹立偉著。推張君蓄書之心。觀陳子之甚似。知其刻厲。寧能以中畫也邪。兩京雄富。夫旣身履而目受之。豪勁厯錯。可夸可愕。接於歌謠。風氣之盛。必將矢言沈深。以鳴夫太平。身安道充。必不戚戚以求外也。老子嘗曰無爲無不爲。國之本也。願歸以究之。異日詢咨以承。專美於前者。將有繼矣。勉乎哉。事豫則備。若然則其寧有不

能者邪凡我同志宜爲詩以餞。

送劉生歸鄉試序

漢五經各立博士。唐兼以詞賦取士。至宋廢置不一。然各精其能者。始得爲主司。五經難以兼。而詞賦號爲淺且難。以淺且難而兼五經。孔鄭復生。不能爲也。科舉廢旣久。先皇帝慨然崇文。酌損爲進士條制。今將十年。巖居谷隱。習其學者。家傳而戶授。其蕪拙而宜黜者。主司之任也。余嘗預考進士于禮部。鄉貢而來者。蓋疑之而不敢有汰也。汰則德傷而體損。由江以南。求試于外省。多至八千餘人。司繩墨者。其無乃失於銓考與。抑亦以其耳目聞見之不接者而疑之與。以昔賢之所難而兼之。其於任也實重。古學之不講。于今有年矣。卒然加士林之上。冒焉以承。不咎于己。而曰試者之未至。故取之常合。其譾薄進于禮部。禮部不得已足其數。觀其所取者。則咎禮部之未至。禮部諉受其責。吾知夫八千之士。功深而學優者。詎不大有遺者矣。廣信劉生。任時來京師。試入國學。將敘次。佐胄子講誦。今歸省其母。試于鄉。生敏于文。從余游焉。厄人事。不能以悉告。嘗有卒成父先生於羣經有攷而爲書者也。於詞學。父師之所授。充然而炳。鏘然而和。東南西蜀。蔑以有及也。生負笈而問之。若登泰山。矐乎有失矣。使先生不以耄老辭。則東南之士。類于禮部者。將拔穎以進。生蓋亦有得矣。勉之哉。

仰高倡酬詩卷序

今年春。房山高公彥敬歸休于舊隱。夏五月。延陵吳君成季首爲歌詩。以致其懷賢之思。於是次于其後。

者。凡十餘人矣。獨清河張侯與成季復肆奇逞敏。纏繻用韻不輟。筆未脫手。語未終舌。而兩家使者各踵戶限。故其飛籌急置。如督餉道於劍閣棧道之險也。角形擇利。如薄虎象於蒐狩之野也。風恬而水湧。欲挂席而爭進也。弓良而矢直。欲並發而連的也。至於夸豪競富。金張之靡。崇愷之侈焉。噫。何其至多若是也。古之言倡酬者曰元白。其次莫若皮陸。彼皆因其事物之偶然。有合於風雲泉石之清適。故麗者流於情。羈者鄰於怨。而今也因房山之賢。有以興其思。復因其思以發其所養。異夫逐物而忘己者多矣。房山筆精墨潤。澹然丘壑。日見於游藝。此詩之作。其所以惓惓不忘者。難與俗子語。姑以見夫思賢之心。在於寬閒自得之後。不在於爵祿有列之時也。詩成。凡若干首云。

送陳仲剛序

昔之職文墨議論者。必擇其瑰逸俊磊以自近。唯取其才焉。才與德不相並。或者譏之謂德不勝。不足以爲君子也。今有番陽陳仲剛焉。其言恂恂。其度謹。且循於事也。不欲察其是否。見一善焉。不知其爲矯且詐也。翕而譽之。人議之。我且直之。其不善也。人議之。則曰彼豈誠不善也。將訓迪之。俾有以悛之。嗚呼。是則人誰有議焉者矣。黨同惡異。以其類至。鼎鑿之遺。酒食之失。足以亡其國而廢其身。可勝道哉。吁。是則有可憫者矣。余向爲史屬。見南士焉。執案牘者。刻若法吏。其滑稽跖弛。不善避忌。酒酣大言。無所顧。吾深憂之。未幾而陳仲剛亦受其讒以去。仲剛之失。在不能以自斷。彼之言者。一無犯何慘也。今朝廷下詔蒐舉遺逸。仲剛可以仕矣。而復以守資歷者。不在是限。遂以外郡校官補之。始得爲教授。老至而濡滯。彼獨

何心哉。喜怒以害天下之士。莫嚴於後漢之季。盛時清明。孰敢少肆其毒。不十年間。今皆漸盡。無在可歎也。已可哀也。已仲剛調湖廣。將行。予以悼其窮。亦以激其有自立文辭之素能者。不敢以告勉之哉。

陳彥恂餞行詩後序

士之爲吏病。飭於內而驚於外者多矣。飭乎內者。無赫赫之功。而亦不足以取仕。驚於外者。自處善士之目。率先得大官厚祿。故仕而臨民。雖百里之邑。其勢亦足以動衆。智亦足以防口。凡所居官。將解印綬。必諷諭能爲文章者。書刻其政績。方古循吏。殆未愜意。間有不肯操筆。輒威脅罪誡。閭里耆艾。爭相效承。長縑巨軸。聯衢表道。先出郊餞祖。語嘖嘖不自已。迨其去官。猶視彼黜陟爲廢置。而士不幸爲師儒之官者。則不能是。蓋其秩最卑。勢最下。其行事不能以致衆。方苟度歲月。以冀脫去。故來也無聞。去也無迹。而儒者之道。愈缺然矣。噫。先生致治之效。必本於學校之興廢。而謂其道不足以致譽。以自棄者。則過矣。且譽果可以致而得哉。余父友陳君。以越博士歸于家三年。將調官。行邁越之鄉大夫。以及博士弟子。詠述遺愛。致詞于家。詩凡若干首。同里之姻黨。異郡之交友。爭歎美贊誦。詩亦凡若干首。而天台胡公。復敘昔日輿人之意。圭璋交輝。金石迭響。殊績細行。指掌畢具。斯亦偉矣。夫不求而自至者。非媚也。歲久而名益彰者。非強也。彼勞甚而無聞者。非過也。庸敘其言。期以信于後。敢繫于篇末云。

送洽師歸吳序

四明學行於浙東西。而南湖延慶寺。實尊者闡釋之遺地。陳忠肅公原觀想而爲之記。甲於東南。至嘉定

中史忠獻傾意營繕。莊嚴妙密。學子林立。運逢壞空。不四十年。兩遭燬厄。寺缺主者。僉以爲石泉治公宜。主是席。至之日。除榛削礫。一以己任。而四明罹旱疫之災。信者靡替。施者莫能。乃慨然曰。吾故吳產也。吳多信士。凡頽垣廢址。吾徒一詣其門。輒金帛踵至。高者蠹雲霄。樸者絢丹碧。崇信生於心。斥其餘財以貽浮屠氏。非有所利益也。嘗聞治公化行吳中。所至傾接。蓋以能靜止息之道。廣爲譬釋。夫安於給足。而哀樂喜怒爲其營役。則聞治公之說者。孰不開朗。故其欣然以輸。肅然以接。夫豈聲音笑貌之傾動。嗟夫。露臺百金。十家之產。而大雄氏以側布爲未足。化其吝心。非大言不足以警。若是則是行也。見其捆載以歸。不日以就。罔俾忠獻專美於前。而忠肅之學。願竊有取焉。